

*ASO LUA, 15 FEPUARI 2022*

*Na nofoia e le Fofoga Fetalai le Nofoa i le itula e 9.30 i le taeao.*

Tatalo.

**FOFOGA FETALAI:** Ou te faasilasila atu ua amatalia nei Taulumaga a le Fono Aoao Faitulafono.

**FAAALIGA MAI LE TAITAI O LE MAOTA**

E tusa ai ma le Tulafono Tumau 76 a le Palemene ua ou tuuina atu nei le Faaaliga i le Fono Aoao Faitulafono mo le iloiloaina o le Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Tulafono o le Ofisa o Tiute 2022.

**TUUINA ATU** i lenei aso 14 o Fepuari, tausaga 2022.

Hon FIAME Naomi Mataafa

**TAITAI O LE MAOTA**

**FAAALIGA MAI LE TAITAI O LE MAOTA**

E tusa ai ma le Tulafono Tumau 100(2) ua tuuina atu nei le Faaaliga i le Fono Aoao Faitulafono mo le iloiloaina o le Tulafono Tau Faaofi ua taua i lalo i lona tulaga faanatinati:

1. Tulafono Tau Faaofi o Teuteuga o le Tulafono o le Ofisa o Tiute 2022.

**TUUINA ATU** i lenei aso 14 o Fepuari, tausaga 2022.

Hon FIAME Naomi Mataafa

**TAITAI O LE MAOTA**

## ISI FAASILASILAGA A LE FOFOGA FETALAI

**FOFOGA FETALAI:** Ou te muai lalagi sugalu ma ou momoli feetaga leaga e faigata paia o le Maota nei. O le molimau ma le matau, e le i faigata le aleiga o le sa na utumatagi, e ui foi ina taia i le silasila ma le laau na i le lima, ae tatou te faafetai o le Atua e ou le valaauina. Ua tatou fesilafai i manu faaifo mai lagi i lenei taeao manuia, o le viiga e tumau pea i le Atua aua o Ia ua mafua ai.

Ou te faatalofa atu ai i le paia o le tatou Maota i lenei taeao, i le afio o lau Afioga i le Tamaitai Palemia, afio lau Afioga i le Sui Palemia, afifio a outou Afioga i Minisita o le Kapeneta, faapea foi Afioga i Minisita Lagolago.

Afio lau Afioga i le Sui Taitai o le Itu Agai ma le mamalu o sui usufono uma o le Palemene. Malo i lo outou soifua manuia ma le lagi e mama, ua le nofoia nisi o Nofoa o itumalo i totonu o le Maota i lenei taeao, ona o gasegase ma tuatuagia le maalofia. E faapea lava uiga o le tatou soifuaga, ae tatou lafoai pea i aao faamalolo o lo tatou Atua ma ia tuliloaina i latou i Lona agalelei, se aso tatou toe feiloai i le manuia.

E faafeiloai atu foi i le afifio mai o Ofisa Sili o Pulega o Matagaluega ma Faalapotopotoga Tumaoti a le tatou Malo, taeao manuia, malo le onosai.

Lau Afioga i Le Ao Mamalu o le Malo ma lau Masiofo, lau Afioga i le Sui Tofia ma lou Faletua, lau Afioga i le Faamasino Sili ma le mamalu o le Faamasinoga, le tapuaiga a Faauluuluga o Ekalesia Kerisiano uma i le atunuu, ma le aufaigaluega faauuina o le Talalelei, ua faamalo le soifua manuia, malo le lagi e mama.

Samoa le atunuu pele i ou mamalu ma paia faaleaganuu, ou te talitonu o lo mauuluga lo outou soifua manuia ma le lagi e mama, ua faamalo folau. Tatou faamoemoe pea i le Atua, e le gata o mea uma tatou te fuafua mo le manuia o le atunuu, ae sili o Lana puipuiga malu i faigata e ono lamatia ai le tatou folauga i lenei tausaga.

Le alofaiva o le Palemene i lenei taeao, ia i ai le agalelei o le Atua, manuia le usugafono i lau Afioga i le Tamaitai Palemia ma le Kapeneta, manuia le usugafono a sui usufono mamalu uma o le Palemene, manuia le tapuai mai a si o tatou atunuu i ona tulaga faalupelupeina.

Ou te talitonu e le toe tau faamaninoina le tulaga o le faamai o le Koviti-19 i lo tatou atunuu, e ui o lo o agalelei pea le Atua e ala i Lana puipuiga malu i le soifua o le tatou Maota nei ma le atunuu atoa, peitai, e le o tuuaunoaina ai le galuega tau puipuiga a le tatou Matagaluega o le Soifua Maloloina, aemaise o le taimua a le Komiti o le NEOC. O le sini o ia galuega laveai, o le faatinoina lea o le tuiga lona tolu, i le naunautaiga ia mafai ona laveai pea Samoa mai ni aafiaga ogaoga o lenei faamai i le agai atu i le lumanai.

O ananafi na tuuina mai ai le fautuaga mai le Matagaluega o le Soifua Maloloina e tauala mai i le tatou Komiti o le NEOC mo le fia faatinoina o lea faamoemoe taua mo sui usufono uma o le Palemene. Ua ou talia le

fautuaga i le agaga o le Nofoa, e tatau lava ia i tatou o Taitai o le atunuu ona amatamea i mataupu tau le soifua maloloina mo le puipuiga malu o le atunuu lautele.

Ou te talitonu foi, o se faatinoga o le a fai ma auala e silafia ai e nai o tatou tagata le taua o le galuega o lo o taumafai atu e le tatou Malo ma tatou o Taitai e taua atu i le Matagaluega o le Soifua Maloloina, o le a faigofie ai foi ona tatou galulue faatasi ma le atunuu mo se Samoa saogalemu i tulaga tau le soifua maloloina i lenei vaitau i le tau tineia o le faamai ua aafia uma ai le lalolagi.

Ua maea logoina aloaia lo outou mamalu e le tatou Ofisa i le ananafi. O le taimi o le tatou malologa i le itula e 1:00 i le aoauli nei, o le a faatinoina ai le tuiga lona tolu mo sui usufono uma o le Palemene i le vaega o lo o malolo atu i ai le paia o le Palemene i tua atu o le tatou Maota nei. Alolofa a outou Afioga, mo le lelei faagasolo o lea faamoemoe, faatasi ma le faamautuina o faamaumauga a le Matagaluega e moomia lou afio atu faatasi ma lau pepa tui. E faia lava ia mea uma ma lo tatou faatuatua, o auala ia ua saunia e le Atua e taua mai ai Lana faamalologa mo si o tatou atunuu.

## **ISI FAASILASILAGA A LE FOFOGA FETALAI**

### **POLOAIGA MO FAALAVELAVE TUTUPU FAAFUASEI**

E faasilasila atu i le mamalu o le Palemene ua ou taulimaina nei Teuteuga o Poloaiga mo Faalavelave Tutupu Faafuasei mo le Koviti-19, e pei ona faamaonia e Lana Afioga, O le Ao o Le Malo, Tuimalealiifano Va'aleto'a Sualauvi II, i luga o le Fautuaga a le Kapeneta e pei ona taua i lalo, mo le faataatiaina i le Laulau-a-Fono.

1. Poloaiga o Faalavelave Tutupu Faafuasei Numera 68, na amata faamamaluina i le itula e 6:00 i le afiafi o le aso 11 Fepuari 2022.

### **TUUIINA ATU O PEPA**

*Na tolaulauina e le Failautusi i le Fono Aoa le faasologa o Pepa e tusa ai ma T.T.49(2).*

1. P.P.2021/2022 Nu.43, Lipoti Faaletausaga a le Faaputugatupe Teu Faafaigaluega o Mavaega Tausi a Samoa mo le Tausaga Faaletupe faaiiina i le aso 30 o Iuni 2021.
2. P.P.2021/2022 Nu.44, Lipoti Faaletausaga a le Matagaluega o Galuega, Felauaiga ma Atinae Eseeese mo le Tausaga Faaletupe faaiiina i le aso 30 o Iuni 2021.

3. P.P.2021/2022 Nu.45, Lipoti Faaletausaga a le Komisi o le Toefuataiga o Tulafono o Samoa mo le Tausaga Faaletupe faaiuina i le aso 30 o Iuni 2021.
4. P.P.2021/2022 Nu.46, Faamatalaga o Tupe a le Malo mo le Tausaga Faaletupe faaiuina i le aso 30 Iuni 2020.
5. P.P.2021/2022 Nu.47, Lipoti o le Faiga Palota Aoa 2021, Ofisa o le Komisi o Faiga Palota.

Ma le faaloalo lau Afioga.

### **TULAFONO TAU FAAOFI O TEUTEUGA O LE TULAFONO O LE OFISA O TIUTE 2022 – faitauga muamua**

**FOFOGA FETALAI:** Tulai mai lau Afioga i le Minisita o Tiute ma Tupe Maua Honourable Tuala Tevaga Iosefo Ponifasio.

**Afioga Hon TUALA TEVAGA IOSEFO PONIFASIO (Minisita o Tiute ma Tupe Maua):** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Ofisa o Tiute 2022 i lona faitauga muamua.*

*Faalua e le Minisita mo Faatoaga ma Faigafaiva.*

*Na faitauina le Tulafono Tau Faaofi o Teuteuga o le Tulafono o le Ofisa o Tiute 2022 i lona faitauga muamua.*

### **TULAFONO TAU FAAOFI O TEUTEUGA O LE TULAFONO O TIUTE 2022 – faitauga faalua**

**FOFOGA FETALAI:** E talu ai ua ou taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu loa mo le faitauga faalua o le Tulafono Tau Faaofi.

Tulai mai lau Afioga i le Minisita o le Matagaluega o Tiute ma Tupe Maua.

**Afioga Hon TUALA TEVAGA IOSEFO PONIFASIO:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Tiute 2022 i lona faitauga faalua ma ou te fia tautala faamalamalama i ai.*

*Faalua e le Minisita mo Faatoaga ma Faigafaiva.*

**FOFOGA FETALAI:** Ia, tulai maia lau Afioga i le Minisita e saunoa ma faamalamalama.

**Afioga Hon TUALA TEVAGA IOSEFO PONIFASIO:** Lau Afioga i le Fofoga Fetalai, ou te faafetai tele mo lou avanoa. O lea ua patipatia ma aleaga le Maota i Tiafau nei, o lea ua utu le malama i tula o mauga i lenei aso fou, aua o lea sa e sisi ma faamanusina le atumua i lo tatou taeao, aua le Atua ma Lana puleto, o Lana pule faasoifua ua mafua ai ona toe feiloai le Palemene o Samoa i lenei taeao manuia, aua o lupe sa vaoeseese a o lea ua toe fuifui faatasi i le alofa ma le agalelei o le Atua. Sa e aapa foi ma e sele manu puegata ina ia to mai le lagi uaga o faamanuiaga e utumuli ai le faiva o le Palemene i lenei aso, faamalo le sisi, faamalo le pale, faamalo foi i lau Afioga mo le taulaga na molia i lenei taeao. Ae ou te fia tautala ma le ava ma le migao tele e tusa ai ma le Tulafono Tau Faaofi o Teuteuga o le Tulafono o Tiute 2022 i lona faitauga lona lua.

Lau Afioga i le Fofoga Fetalai, o le Teuteuga o le Tulafono o Tiute 2014, o le Tulafono Autu lea e faamaonia ai ni suiga e aafia ai galuega a le Komiti Faafoe o Tupe Faafaigaluega a le Malo po o le Investment Committee. O lenei suiga, e faamausali ma aloaia faaletulafono ai le galuega a le Komiti Faafoe i lalo o le Tulafono o Tiute 2014. O le Komiti Faafoe o Tupe Faafaigaluega a le Malo, o le Komiti lea o lo o nafa ma le iloiloaina o talosaga ma poloketi faapisinisi ua agavaa po o qualifying projects. O nei poloketi faapisinisi ua agavaa mo se fesoasoani e ala i le tuusaunoaina o tiute o oloa, duty exemptions o lo o faapea ona aumai fafo i totonu o le tatou atunuu i lea taimi ma lea taimi pe a talosagaina.

O lenei Komiti Faafoe latou te vaavaai totoa, ua na o kamupani ua agavaa i lalo o le iloiloaga i le Tulafono, e mafai lea ona ave i ai se faamama avega a le tatou Malo i poloketi faapisinisi, e manatu le Malo e tataua ona ave i ai se lagolagosua aua e taua mo le tatou atunuu aemaise lona atinae. O ituaiga faapoloketi faapisinisi i lalo o le vaaiga a le Komiti lenei, e tauaofia ai poloketi faapisinisi tau vaalele, atinae tetele, falegaosi po o manufactory, ma poloketi o faatoaga ma faigafaiva.

Mo le silafia e le Palemene mamalu, o le Komiti Faafoe lenei o tupe teufaafaigaluega a le malo o lo o nafa foi ma nisi galuega faatino o lo o aafia i lalo o le Tulafono o Tiute 2014. O le mafuaaga autu o nei suiga po o nei suiga, ina ia aiaia ai pea ona mafai ona tuuina atu tuusaunoaga o tiute mo oloa ua faamaonia ua faaulufaleina mai i totonu o Samoa e faasino lea i se galuega tau atinae ua agavaa.

Lua, ia faamautinoa ai le aloaia faaletulafono o le Komiti Faafoe o Tupe Teufaafaigaluega a le tatou Malo latou te faamatuu atu ai tuusaunoaga mai tiute mo oloa faaulufale mai i totonu o Samoa e tusa ai ma se galuega tau atinae ua agavaa.

Mo le silafia i le fono muamua lava a lenei Komiti ina ua tulai mai o le faigamalo fou, sa fesiligia ai faiga faavae ma Tulafono o lo o limataitaiina ai le Komiti Faafoe i ana galuega fai, aemaise foi ana faaiuga e tatau ona fai.

O le faafitauli na tulai mai, o le leai lea o se Tulafono po o se Vaega o le Tulafono o Tiute 2014 e mafai ai ona faatu se Komiti Faafoe ma faatino ni iloiloga ma fai ai ni faaiuga e tuusaunoaina ai tiute o oloa mo talosaga ua agavaa. O le galuega faatino lea a le Komiti Faafoe sa i ai, e faapea ona limataitaiina e le Tulafono Faatonutonu o Tiute, Atinae o Tagata Maimoa ma Oloa Gaosia 2010, Regulations. O lea Tulafono Faatonutonu, o lo o manino ma maioio ai i lalo o le faiga faavae e faapea ai ona iloiloia ia talosaga. O lea foi Tulafono Faatonutonu sa faapea ona maua mai i lona malosiaga faaetulafono mai lalo o le Tulafono o Tiute 1977, lea na faaleaogaina pe repeal, ina ua tulai mai le Tulafono o Tiute 2014.

O le mafuaaga lea ua ae ai se manatu i le Kapeneta ina ia fai se suiga e faamausali ma faatulafono aloaia ai le galuega a le Komiti i lalo o le Tulafono o Tiute 2014.

O le ala lea ua tatau ai ona faaopoopoina ai le Fuaiupu 127A i lea teuteuga ina ia tuuina atu ai le malosiaga faaetulafono i le Komiti Faafoe o Tupe Faafaigaluega a le Malo aua le tuusaunoaina o oloa auina mai ma nisi o poloketi ua agavaa i le tuusaunoaina ma mafai ona faamanino atili ai matafaioi e fitoitonu i le Komiti Faafoe.

O lena foi ua tuuina atu ma se faaopoopoga o aiaiga faasaoina ma aiaiga tau soloaiga ona o teuteuga ua alagatau ona fai.

Lau Afioga i le Fofoga Fetalai, ia o nai suiga na aua le faaleleia atili o le Tulafono, e maua ai nai faamanuiaga mo nisi o faipisinisi mo tatou tagata aemaise foi faalapotopotoga o lo o fesoasoani i le atiaeina o le tatou Malo. O le agaga maualalo i lou nei faatauvaa lau Afioga i le Fofoga Fetalai, o le tatou Palemene e galulue faatasi ia faalauleleia mea uma aua se manuia o Samoa. E tuuina atu lenei Tulafono mo felafolafoaiga a le Palemene mamalu, ma ia saga faamanuia pea le Atua i lau Afioga i le Fofoga Fetalai, aemaise le Taitai o le tatou Malo, lau Afioga i le Tamaitai Palemia, ma sui usufono taitasi o le Palemene o Samoa.

O le tatalo, ia maua pea so outou malosi faaletino, ia tatou maua pea le agaga tafesilafai aua upufai o Samoa mo le tatou tapuaiga i le Atua. Manuia Samoa, manuia le fono.

**FOFOGA FETALAI:** Ua faamalo faafetai saunoa i lau Afioga i le Minisita o Tiute ma Tupe Maua aemaise foi o le faailoa manino o le taiala o le Tulafono e pei ona i lumamea nei o le paia o le Maota. Malo saunoa faafetai foi tapena. Faafetai foi i le Ofisa Sili o Pulega ma le Matagaluega mo le tapenaga.

Ia, o le avanoa lenei i se sui usufono o le Palemene. Ia, lea ua matau atu o lea ua oli mai le... Ia, lau Afioga i le Sui Taitai o le Itu Agai.

**Tofa Hon LAUOFO FONOTOE NUAFESILI PIERRE LAUOFO (Anoamaa 2):** Faafetai i lau Afioga i le Fofoga Fetalai. Ua i ai le lagona o le a ou tamua ia i lenei taeao e tusa ai ma le Tulafono Tau Faaofi Teuteu ua opea i le Maota.

Ae manatu o lea ua tea i lagi le fetu tai matagi aua lo tatou vatapuia ma lo tatou Matai Sili o i le lagi. Ou te manatu o lea ua taoto i lagotonu le pale o le talalelei i lenei taeao. Ia, o paia foi o sa ma faiga o le atunuu, ou te talitonu o lea ua maea ona e paepae faatupe o taulafoga. Ua e faatalofa foi ma e ofo alofa i le tapuaiga a le atunuu mai ona ao seia oo i ona iu, ae faapea foi le afifio mai ma le papaaa o Ofisa Sili o Pulega o Matagaluega a le Malo. Ia, ua tatou i ai faatasi i lena. Faafetai.

Ou te tulai atu e taumafai se lagona e tusa ai ma le Tulafono Tau Faaofi ua maea ona saunoa malamalama i ai le Afioga i le Minisita o le Matagaluega o Tupe Maua. O tulaga masani e pei ona silafia lau Afioga i le Fofoga Fetalai, e pasia e le tatou Maota Tulafono Autu. A maea Tulafono na pasia e le Maota, ona faapena lea ona tuu i ai le saina aao o Le Ao Mamalu o le Malo ma avea ma Tulafono Autu. A o totonu o na Tulafono Autu o lo o i ai fuaiupu ma se vaega e mafai ai ona fausia ma tuufaatasia Tulafono Faatonotonu po o Regulations. O Tulafono Faatonotonu e fausia ma pasia ma faamaonia e le Kapeneta, e le oo mai i le Maota lenei e fai ai felafolafoaiga a le Maota. E manino le tulaga lena, ma o lea la ua maua i lenei taeao i le tau matau atu i le Tulafono a le Minisita. O le Tulafono o Tiute sa fausia ai ma tuufaatasia ia ni Tulafono Faatonotonu, lea sa taua le Tulafono o Tiute ma Turisi, Custom and Tourism Regulations 2010. O lalo o Tulafono Faatonotonu nei, e aofia ai ma isi Tulafono Faatonotonu o le Custom Development Projects. O lo o aumai ai le malosiaga ma faavae ai le Komiti o Tupe Teu Faafaigaluegaina po o le Investment Committee, sa amata mai i na vaitaimi ina ua pasia ma ave i ai le tulaga aloaia faale-Tulafono o Tulafono Faatonotonu na, sa faafoefoe mai ai la mataupu nei ma le faiga faavae lautele nei a le Malo, na i ai foi i lena vaitau.

O le tuuina atu lea o fesoasoani e ala atu i lafoga po o le tuusaunoaina o lafoga, i kamupani tetele e omai e faatu ni latou poloketi i totonu o le atunuu. O lea la e matau atu, o le uiga o upu ia e aumai i le Tulafono toe teuteu lenei, o le uiga o upu ia o le qualifying projects ma approved goods. O uiga o upu nei po o faamatalaga o upu nei, o lo o i totonu o Tulafono Faatonotonu. O lea sa faavae mai ma faatino ai galuega a le Investment Committee i le tele o tausaga. O lona uiga i lau vaai, o lea lava e sologa lelei lava tulaga e tusa ai ma le Tulafono. I lau matau, e leai se vaega e faapea sa i ai se lape o le Tulafono. E pau le mea lea ua ou matau atu, ua aumai uiga o upu la e i le Tulafono Faatonotonu, e tuu i totonu o le Tulafono Autu lenei. O lona uiga, e pei ona aumai i le faamatalaga o le Tulafono Tau Faaofi, o lea e faapea mai, “Ina ia faamautinoa ai,” e foliga mai e le o mautinoa i Tulafono Faatonotonu o Tulafono laiti na.

Ae i le tele o tausaga o faagaioi mai polokalame ma poloketi nei, o la lava sa mautinoa ia tulaga uma sa i ai. Aua o le ala o mea e masani ai i le Komiti lenei, a ave se talosaga e iloilo e le Komiti. A maea ma ua i ai se manatu o le Komiti e tataua ona talia, ona faataoto loa lea o oloa po o goods, qualifying projects ona ave lea o pepa i luga o le Kapeneta mo se faamaoniaga a le Kapeneta.

O poloketi uma na faavae ma faatu i totonu o le atunuu i lalo o Tulafono Faatonutonu nei, sa i ai le faamaoniaga a le Kapeneta sa i ai foi i lena vaiata. O lea lava e afifio mai nisi o latou sa i ai i na vaiata ma faamaonia talosaga pei ona tuuina atu i luma o le Kapeneta. O tulaga lava ia i lau vaai, o lea e aloaia tulaga uma faale-Tulafono, e leai se tulaga faapea ua faasolitulafono. Ona e pei e i ai le isi vaega lea o le Tulafono Tau Faaofi lenei, o lo o pei e tau atagia mai ai se tulaga faapena, i se faaupuga faapena.

O le mea la lena e fia oo muamua i ai se tautalaga o le tulaga lena, i lou talitonuga e leai se mea faapea e le o tusa ai ma le Tulafono ia tatou mea e taua, e pei o poloaiga, po o orders e tuusaunoaina ai ia tiute e faaulufale mai ai i totonu o le atunuum tiute o oloa e faaulafale mai, i atinae tetele nei.

Lau Afioga i le Fofoga Fetalai, o faiga faavae na sa faataoto mai i ia vaiata i na foi Faigamalo. O le tuusaunoaina o tiute o atinae, e pei ona saunoa le Minisita, e i ai falegaosi oloa, Kamupani gaosi oloa, e faapea foi le tele o isi mau atinae o faletalimalo, ma isi mau atinae eseese, e pei e aofia ai foi ma le tulaga lea o le faatuina o poloketi, o le gaosiga o le eletise e maua mai i le malosiaga o le la. O poloketi uma ia tetele, o le gaioiga o le faiga faavae ma le autu sa i ai ia faatosina o Kamupani tetele nei e omai totonu o le atunuu. Ina ia maua ai galuega a tagata o le tatou atunuu, e le gata o galuega, ae faapea foi le siitia ai o tulaga o le lelei, o le tulaga o le soifuaga i totonu o Samoa.

O vaega uma ia sa agavaa ai le tele o isi Kamupani, mai le tau amataga mai o isi vaega, sa i ai le Yasaki. O lea foi ua i ai isi Kamupani fou ia ua faaaogaina nei fale ia sa i ai le Yasaki. O faletalimalo tetele uma ia sa agavaa uma i lalo o le polokalame lenei seia oo mai i le aso. O lea foi ou te manatua sa i ai le talosaga sa faatuina ai le Kamupani lea e gaosia ai le pia lea o le Taula. O lea foi sa faatu ai le Kamupani o le Taula, na maua ai foi fesoasoani i isi Kamupani gaosi ava malosi ma le anoanoai o isi mau Kamupani.

O tulaga na sa sau ai i aso ia, ae o le tuusaunoaina o tiute, e le o se mea e manatu mama i ai se Faigamalo. O le mafuaaga aua a tele naunau foi Kamupani e ave i ai le faamanuiaga lea, o lona uiga ua pau foi le tupe e aoina mai e lo tatou Malo, e ala mai i oloa e faaulufale mai i totonu o le atunuu, ona pau foi lea o le tatou tupe maua. O tupe e aoga e faaaoga ai isi atinae o le atunuu, o le faaleleiga o tatou auala, o le suavai, o le eletise o le falemai, ma isi uma mau atinae, o lo o manaomia i totonu o le atunuu, aua le soifua laulelei o tagata.



O lona uiga o lau tala, e tatou te tilotilo i se faiga e fuafua lelei, le tuusaunoaina o tiute, ina ia malu puipuia nisi vaega ma tulaga o le tatou atunuu. O lona uiga, a silasila i le tulaga o le taimi e tuuina atu ai ia poloaiga nei o faamanuiaga, e tatau ona i ai se taimi e faatinoina ai le atinae. Aua ne i avatu le poloaiga, ae tasi, lua, tolu tausaga o la lava e faatali, ae leai se atinae, ae o la ua avatu i ai poloaiga ma faamanuiaga nei. E tasi lea vaega e tatau ona silasila po o a puipuiga e tatau ona i ai, i le tulaga o poloketi ma Kamupani tetele faapenei. O le isi tulaga e pei ona tau matauina i isi talosaga i tausaga ua tuanai, e tasi, lua, tolu Kamupani ae o le tagata lava e toatasi, e ona ina Kamupani ia. E foliga mai, e talosaga e le isi Kamupani faamanuiaga, ona manao lea e faaaoga e le isi Kamupani faamanuiaga. O puipuiga ia ou te talanoa atu ai, o puipuiga o mea faapenei leaga e i ai mo togafiti na e faaaoga, ina ia sao mai ai i le totogiina o tiute.

E pei ona ou talanoa soo foi i mea nei, ma Tala o le Tupe ua tuanai, o le le totogiina o tiute, o se tupe pau foi lena ua le maua e le tatou Faigamalo ma le atunuu aua isi tatou atinae ma fuafuaga e fai, fuafuaga manaomia.

O lea ua matau atu, o lea ua tuu ai i totonu atinae tau faatoaga ma faigafaiva. E tasi lea mea sa aloalosa mai ai isi Faigamalo ua tuanai, i le tulaga lea. O le mafuaaga, ona o le manatu alofa i faifaatoaga a le atunuu, ma aiga tautai a le atunuu. Aua a tatala nei le avanoa lea, e omai i totonu Kamupani tetele ia o faatoaga, a silasila i le Lipoti faale-tausaga a le Ofisa o Faamaumauga, o lo o aumai ai pe 80% o le labour force o le tatou atunuu e galulue i faatoaga. A fai la o le a tatou o e tatala le vaega lea ina ia commercialize ni faatoaga tetele, ia ona manatu alofa ai lea i faifaatoaga laiti. Aua e le mafai ona tauva le tagata o lo o taumafai le limavaivai ma le mativa ma Kamupani tetele. E le gafatia masini e taugata, pe a fai e aumai masini ma agavaa tuusaunoaina o tiute o masini e aumai i totonu e galueaina le eleele.

O le mafuaaga lena o lou talanoa i puipuiga, puipuiga mo le aufaifaatoaga laiti, puipuiga mo aiga tautai o le atunuu, o le aufaialia, ma na i isi tagata faifaatoaga. E tatala le avanoa omai Kamupani o vaatetele. E lelei, e taua e maua ai galuega, siitia foi le tulaga i le tatou export pe a ave le ia e faatau i fafo. Ae a tatala ma faatau i totonu o le atunuu i le maketi ia, maketi i Fugalei ma isi maketi, faatoaga, e tauva ma na i tagata faifaatoaga laiti, e le gafatia. E malolosi lava tama matutua ma tama malolosi ma e tele le tupe. Ona ou manatu alofa lava lea i na i tagata o le atunuu o lo o taumafai.

**Susuga Hon Laauli Leuatea Polataivao Fosi (Minisita o Faatoaga ma Faigafaiva):** Lau Afioga i le Fofoga Fetalai, ou te fia faamalamalama i le saunoaga a le sui usufono.

**FOFOGA FETALAI:** Ia fai mai sau malologa lau Afioga i le Sui Taitai. Saunoa mai lau Afioga i le Minisita, o lea ua oo i Faatoaga.

**Tofa Hon LAUOFO FONOTOE NUAFESILI PIERRE LAUOFO:** E pei ona ou talanoa i puipuiga... E ui lava ina ou le fia malolo, ae o le a ou malolo.

**Susuga Hon Laauli Leuatea Polataivao Fosi:** E leai se agaga e faalavelave i le saunoaga a le sui usufono mamalu. Ae ua ou manatu e tatau pea ona ou tulai atu ona o lea ua taua lau Matagaluega. E ese le tatou talitonuga i le talanoaga lea e fai i le Maota, leaga o lea e faalogologo le atunuu. E ono mafuli ai le uiga taua na fai e le Tulafono, e mafuli ai ina ia ave le agaga e faaoloataua ai le finagalo. O la e faafogafoga mai le aufaifaatoaga ma le aufaifaiva o le atunuu. E le o le agaga lena o le Tulafono a le Minisita, o se taimi foi tulai atu le Minisita. Ua tuumatamaga lava ituaiga pisinisi, e oo i ai le malosi o le aufaipisinisi ia e omai mai fafo. E pei o lafumoā, o lafupovi o lafupuaa ma mea faapena, o lea e agai mai i le taimi lenei. E omai e taufaamapue ma fesoasoani la i tagata laiti nei e taumafai.

E le fou le 2 Kamupani vaa ia tetele la e i tai, Huanan and Big Sea. O ai na faia? Na fai e le Faigamalo lea na uma nei. O la ua o uma i ai le tatou fai alia e faatau mai maunu, o la ua o uma i ai le tatou au fagota, a le lava a latou ia, ua o faatau mai ia toe faatau. E faapena foi le tulaga tau faatoaga lau afioga. Ina ne i mea ane ua toso le saunoaga a le sui usufono, e manatu ai le aufaifaatoaga ma le aufaifaiva, oh... o lea la ua leai se avanoa mo i tatou. O lona uiga e omai loa tama ia, omai fufulu tatou. E leai se tatou maketi, leai se mea e fai. Ae o le agaga lena lau afioga ua ou tulai atu e faasao, ina ne i mea ane o faafogafoga mai le aufaifaatoaga ma le aufaifaiva. E leai se tatou aafiaga i le mea lea. E pau lava le mea lea e faatulai atu ai le Tulafono lenei, ia faatulafono ina ia fuafua lelei le tulaga, aua le soona faia, tuu faitalia. Aua o le mea lena sa i ai le Tulafono lea, tuu i le tulaga faitalia e leai se Tulafono o faatonutonu ai. E pei o lau fesoasoani atu lea, leaga o la e faafogafoga mai le aufaifaatoaga, ua uma ona talanoa i le Maota lenei, commercialization and mechanization, ua uma ona talanoa, o le auala e aumai ai masini, o le aufaifaatoaga lapopoa, e omai e fesoasoani i tatou aufaifaatoaga laiti, o tatou aufaifaiva.

O le ala lea o lou tulai atu ona o la e faafogafoga mai le aufaifaatoaga ma le aufaifaiva, ma lou agaga faaaloalo.

**FOFOGA FETALAI:** O lea ua saunoa lau afioga i le Minisita, lau afioga i le Sui Taitai, ou te iloa ua manino. O lea ua saunoa manino le Minisita o Faatoaga e ana le Matagaluega lea. Ua maotua foi lau saunoaga

**Tofa Hon LAUOFO FONOTOE NUAFESILI PIERRE LAUOFO:** Na fa ita lava e tulai mai le Minisita e ou le Tulafono, ae o lea foi ua tulai mai le Minisita....

**FOFOGA FETALAI:** Ia tuutuu mai i luma lau saunoaga.

**Tofa Hon LAUOFO FONOTOE NUA FESILI PIERRE LAUOFO:** Faafetai i lau Afioga mo le avanoa. O vaafagota la e i tai, e na ona omai lava tranship le ia. O le popolega lea ou te talanoa atu ai, o le maketi ia lea e i i, o le maketi i Fugalei, aua e alu alu loa, ua falake le tulaga o maketi i fafo tulei solo loa i inei. O le manumanuga lena, o lea e avatu ou manatu ma ou mafauauga, ae....

**FOFOGA FETALAI:** Ou te fautuaina le sui usufono mamalu, o lea ua tali le Minisita,

**Susuga Hon Laauli Leuatea Polataivao Fosi:** Lau Afioga i le Fofoga Fetalai, o la e faafogafoga mai le aufaifaiva a le atunuu, e molimau i latou i le mea lea. It will never happen. O la e i tai i le maketi la e i tai i Matautu, ma le uafu la e i Matautu, o la e i ai le export la e agai i fafo. O le maketi la e i Savalalo, o la e fai ai le faiva o le aufaialia ma tagata fagota o Samoa, o le tuumatamaga lena. A o lea ua fuafua mai le isi Kamupani, se taimi saunoa atu le Minisita o Uafu, e agai mai e omai e faatino mea na mo le aufaifaiva o le atunuu. O lea ou te fautua atu i le sui usufono, lauga mai i le tulaga, ae aua le faaoloataua le finagalo o Samoa la e faafogafoga mai.

**FOFOGA FETALAI:** Lau Afioga i le Sui Taitai, e lelei le avatu pea o se fautuaga a le Nofoa.

**Tofa Hon LAUOFO FONOTOE NUA FESILI PIERRE LAUOFO:** Lau Afioga i le Fofoga Fetalai, o le mea lea e tulai mai i, e pei o le eseese o Sasae ma Sisifo mea ia ma te talanoa ai.

**FOFOGA FETALAI:** Se i fai atu le fautuaga a le Nofoa, se o le a tau faalogogata foi oe i lenei taeao. O lo o manino lava le saunoaga a le Minisita, i latou foi faiga faavae ma ana faiga faavae mo le agai i luma. Ua ou piitia le finagalo o le Minisita, ona e pei o le a faaoloataua le faafogafoga mai a le aufaifaatoaga ma le aufaifaiva. Ae ia manatua lelei, o lea ua saunoa le Minisita, e le o le uiga lea o le Tulafono. O le Tulafono o Tiute, ae o lea ua aafia ai fua le aufaifaatoaga. O le mea lea, o lau Afioga foi na tele ina e saunoa ananafi i le tatou Tulafono lea, ae pei o sau homework lea na e sailia lea ua e sau ai nei. Ae ui i lea, faamama mai le saunoaga, ae see ese loa ma le Ofisa o Faatoaga.

**Tofa Hon LAUOFO FONOTOE NUA FESILI PIERRE LAUOFO:** Lau Afioga i le Fofoga Fetalai, e pei o le mafuaaga e ala ai ona tau augata e tali manatu o tatou semina ia na fai ananafi. Ona e le o mau i faamaumauga

a le Maota lenei, le tatou Hansard. O la e silafia e lau Afioga, a oo ina faaaoga e le faamasinoga ia tatou Tulafono, e omai avatu le Hasard e silasila i ai, po o le a le faauigaina o le Tulafono. Ae pei o lea o le a tele manatu e faaali i o, ae le aumaia i i. O i e tatau ai ona faamau finagalo o sui usufono mamalu. E pei o se soso atu lena. Ae fai lava lou finagalo, o oe e i ai le pule, a o le matou taumafai atu na o ni motugaafa, o na i motugaafa e faataatia atu i ina, a aoga faafetai, a leai, a lea e taoto lava i i.

Lau Afioga i le Fofoga Fetalai, pei e faapena se lagona, e mafua ai ona taumafai atu, ona o le tulaga lena. O lea ua aumai foi le finagalo o le Minisita, ae o lea e avatu na i atugaluga. A o lea foi e faamamafa atu i lau talanoa, ni puipuiga, o puipuiga mo tatou faifaatoaga laiti, faapea foi le aiga tautai.

O lea ou te vaai atu lau afioga i le Minisita e ou le Tulafono, o lea e aumai i le tulaga faanatinati ia lau mataupu. O lona uiga la, o lau vaai, e le i i ai se tulaga foi lea e faatalanoa ma le aiga tautai ma le asosi o le aufaifaatoaga a le atunuu, ia le Tulafono lea ua aumai, ae po o le a se aafiaga o i latou. O le mafuaaga lea o le tulai atu. O le tatou sa e fau tele lau Afioga i le Fofoga Fetalai, o le a se matou motugaafa, ia taatia atu i ina, aua foi le faatofalaiga a le Kapeneta ma lena Itu. Pe taua pe le taua a o matou lagona e le taofia.

O lea foi ua tatou talanoa ma aumai le Tulafono, tuusaunoa tiute, e pei lava ona ou fai atu, faamalie, faamalie, faamalie. E le tuua le fautua, e le tuua. Ia tautuana lo tatou sa, i alu alu paulia. Na ona faapena atu se lagona i lenei taeao.

Lau Afioga i le Fofoga Fetalai, ia manuia tele le Fono.

**Afioga Hon Fiamé Naomi Mataafa:** Lau Afioga i le Fofoga Fetalai, o se mea e fia faasao.

**FOFOGA FETALAI:** Ia saunoa mai lau Afioga i le Palemia.

**Afioga Hon Fiamé Naomi Mataafa:** Sa le fia faalavelave i le saunoaga manino a le Sui Taitai o le Itu Agai. E na o le pau lava lea o le faaiuga o lana saunoaga e faapea, o le tuusaunoaina, fai pea, tuu pea. Na ona ou faamanatu atu lava i le Maota lau Afioga i le Fofoga Fetalai, o le tuusaunoaina o tiute, ua leva ona i ai, e le faapea o lea faatoa aumai nei i le teuteuga a le Minisita lea. Atonu o le a saunoa atu le Minisita e tusa ma mataupu ua aumai i lumamea, e na o le pau lava lena. Ona o lea ua faai mai le saunoaga a le Sui Taitai, e pei e foliga o se mea fou le tuusaunoaina, e leai o le mea ua leva ona fai.

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai, e leai e le faia foi se faafinauga i lea mataupu e pei ona tulai mai le afioga i le Palemia. E ava tele foi i le Afioga i le Palemia, o le tuusaunoaina o tiute o le mea ua leva. O le upu lea sa ou fai atu

ai, faamalie, faamalie, faamalie. E ese le faamalie, ese le tuusaunoa. Ma le faaaloalo.

**Afioga Hon Fiamē Naomi Mataafa:** Lau Afioga i le Fofoga Fetalai, ia tatou talanoa o tatou sa i ai uma i le Kapeneta ma le Palemene ua leva. Saunoa mai i le veape lea i le va o le tuusaunoa ma le faamalie, ia tatou vaai po o ai sa faamalie. O matou lea e tau fou mai, e na o le pau le auga o le faamoemoe o le Minisita, se i faataatia lelei le tatou Tulafono ma alafua tatou te savavali ai, atonu e puipui mai ai foi i le itu lena o le faamalie.

**FOFOGA FETALAI:** E leai ua maea lou taimi....

**Tofa Hon LAUOFO FONOTOE NUAFESILI PIERRE LAUOFO:** Lau Afioga ma le faaaloalo lava, ua uma lau lauga, ae pau lava lea ona o le faauilavea o lea e agai mai le Afioga i le Palemia ia te au. O le vaega lea o le faamalie, po o ai le itu e faamalie, a o ai na faamalie. Se o la foi sa e saofai ai lau Afioga i le Palemia i o i na taimi. A fai na faamalie lena vaitaimi, lea foi ua faamalie lenei, ia na e te silafia.

**FOFOGA FETALAI:** Ua maea lou taimi.

**Afioga Hon Fiamē Naomi Mataafa:** Lau Afioga, o le mea lea e eseese ai, po o fea le mea e ave i ai le faamuamua, o le faamalie, po o le savali i luga o le Tulafono.

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai, e pei lava na ou talanoa atu, e leai se solitulafono o i totonu o mea ia na fai.

**FOFOGA FETALAI:** Ua uma lou avanoa, ua uma lou avanoa.

**Tofa Hon LAUOFO FONOTOE NUAFESILI PIERRE LAUOFO:** A o le faaupuga o le Tulafono Tau Faaofi lea ua aumai, e le sao.

**FOFOGA FETALAI:** O lea ua uma ona tali atu le Malo, e le toe faasilia foi se isi tala o lea ua tali atu le Malo. O le mea lea, malo le saunoa, o le mea sili ona taua, o lea ua fai ma tali atu na i fesili ina ia vave ai le Tulafono.

Ia tulai mai le sui usufono mamalu o Faleata Nu 3.

**Tofa LEALAILEPULE RIMONI AIAFI (Faleata 3):** E faafetai i lau Afioga i le Fofoga Fetalai mo le avanoa, e tusa ai foi i lenei taeao, ua potu i Futiafu le mamalu o le Fonousu a Samoa. E faafetai mo le Tulafono ua tuuina mai. E pei lava ona faafofoga i saunoaga. E le o se mea fou lea mea

o le tuusaunoo o tiute mo atinae talafeagai aua le atinaeina o Samoa, o le mea ua leva ona faatino mai.

A tatou vaai i ai i le sector lea sa ave i ai le faamuamua, o le turisi, e amata le Tulafono lenei, ua matua i lalo lava, pe na o se 2% pe 5% o le sao o le vaega lea i totonu o le GDP po o tupe maua a Samoa. O lea ua faatino le tulaga lenei ma fesoasoani a le Malo, o lea ua oo i le 20% i le 25% o le tupe maua a Samoa e maua mai i i le turisi, \$500 miliona i le tausaga. O i e atagia ai, tulaga na ave i ai le faamuamua ma mafuaaga. Ou te le iloa la po o ai na faamalie, a o ai na le faamalieina, a o tagata uma lava na talosaga, e tataua ona fua i luga o le mea e avatu ai le talosaga.

O le tulaga lea e fia oo i ai se faamatalaga amata, ona o le saunoaga a le Afioga i le Minisita, e leai se Tulafono na faia ai mea nei. O le mea moni lau Afioga, o lena e manino lava. E moni na repeal le Tulafono i le 1977, ae lena e manino lava le vaega o le Tulafono, o lena e i ai avanoa e faaauau ai pea Tulafono Faatonutonu mai lea taimi i lea taimi, e mafai ona faauau. Ona o lea e manino, o lea na saunoo, e i ai le Tulafono Faatonutonu, le Regulation. O Tulafono Faatonutonu na, e le tau aumaia, e pei ona saunoo le Sui Taitai, o lena sa faatino ai le tulaga lenei. O le mea lea e popole ai, i faapea sa faasolitulafono le faiga o mea nei.

**FOFOGA FETALAI:** Ou te fautuaina le sui usufono mamalu, ne i te i ua...a o lea e faafofoga le mamalu o le atunuu. E le o i ai lava se tulaga faapena o taua i le Tulafono, saunoaga a le Minisita, mataupu faasolitulafono se mea. E fesoasoani atu i sui usufono o le Palemene, e le o i ai se Tulafono, i se tulaga faapena o taua i le saunoaga a le Minisita, po o le Malo, a mea ua faasolitulafono se mea ua fai. E pau lava le mea lea e i ai, o le faaofi maiga o suiga ina ia faaleleia atili ai mo le agai i luma. Ina ne i mamafatu le tatou talanoa i le uiga ma Tulafono pe sa faamamalu pe a, ae afaina ai le faafogafoga a le atunuu. O le uiga o le tulafono e pei ona saunoo le Minisita, se i toe teuteu ma faaleleia mo le agai i luma. O le fesoasoani atu lea i le sui usufono mamalu ina ia faafaigofie ai le tatou mataupu.

**Tofa LEALAILEPULE RIMONI AIAFI:** O le tulaga lea faafetai o lea ua faamanino e lau Afioga lea vaega. Ona ne i te i, ona e i ai tala na tau maua faapena. O le mea lea e tulituli e le Tulafono lenei i lau tilotilo i ai, o lea ua aumai ina ia specific, particular, se mea manino e patino lava i totonu o le Principal Act e reflect ai, ia atagia ai le mea lea e i totonu o le Tulafono Faatonutonu. I lou talitonuga, o i ina lea e manino i totonu o le Tulafono Faatonutonu lea e faaauau pea, lea sa maua mai ai le malosiaga e faatino ai lenei mea. A o le aotelega o nei Tulafono tatou te faia i inei mai le amataga, o intention, o le agaga e faatino ai se Tulafono. A fai o le agaga ia manuia ai Samoa, o le tulaga lea. O le vaega foi ma le aano lea ua aumai i le Tulafono,

ina ia faasolo i isi vaega e atinae ai faatoaga, e lagolagoina e lenei sui usufono.

**FOFOGA FETALAI:** Se i onosai mai lava. Ia tulai mai lau Afioga i le Minisita o Galuega.

**Tofa Hon Olo Fiti Afoa Vaai (Minisita mo Galuega, Felauaiga ma Atinae Eeseese):** Lau Afioga i le Fofoga Fetalai, e faamalulu atu i le Afioga i le sui usufono o Faleata, leaga o lea ua faalua ai nei le taua e le Itu Agai le tulaga o Regulations, e faapea e gata lava i o i le Kapeneta. Masalo ua galo i lou uso a sui usufono, a o ma Itu Agai, ma te fesiligia lava Regulations pe o le a le mea e le oo mai ai i totonu i i. O lea e i ai le tulaga e uma le tai tolu tausaga faatoa oo mai. O lea tatou te iloa, e oo mai lava Regulations i totonu i i, ona o le Tulafono, e tatau ona pasia e le Palemene. A o le faalavelave i le mea na tupu, e tuai mai ona o le practice po o ni mea foi lea e fai ina ia aua ne i iloa e le Palemene mea ia. O le molimau o lau faamatalaga lau Afioga i le Fofoga Fetalai, o le faamasinoga lea e faaaoga ai a latou galuega, lea e faaaoga ai Tulafono a le Palemene, e fesiligia foi Regulations i i, i galuega a le faamasinoga. O le mea lea e le sao le mea lea, e faapea e gata i le Kapeneta, o le practice lava lena a le Faigamalo sa i ai. A o le tulaga lea ua silasila i ai le Faigamalo lenei, e ao lava ona aumai uma mea tau Tulafono Principal Act e pasi atu i totonu o le Maota lea e pasia atu ai Tulafono a le Malo.

**Tofa Hon Lauofo Fonotoe Nuafesili Pierre Lauofo:** Lau afioga i le Fofoga Fetalai,

**FOFOGA FETALAI:** E pei o lau Afioga i le Sui Taitai lea na e taua le tulaga lea.

**Tofa Hon Lauofo Fonotoe Nuafesili Pierre Lauofo:** Ioe, o au, o le mafuaaga lea o le tulai atu. O lea e silafia lelei e lau afioga, o le malosiaga lea e pasia ai e le Kapeneta ia Tulafono Faatonutonu, o la lava e i lalo o le Tulafono. O Regulations e oo mai i le Maota, a o le mea lea sa ou fai atu, e le faia ai ni felafolafoaiga a le Maota, ua tatau ona e manatua lena mea. A o lea e fai ma table Regulations ona o le Tulafono, e aumai table i i, pe a uma ona pasia. Ae le faia ai ni tatou felafolafoaiga. Faafetai i lau Afioga i le Fofoga Fetalai.

**FOFOGA FETALAI:** O lea ua manino lea tulaga. Ona o lea ua oulua finau, a o la e tulai mai le sui usufono o Faleata Nu 3.

**Tofa Hon Olo Fiti Afoa Vaai:** Lau afioga, o le mea lava lea e faasao atu, o Regulations o le Tulafono, o tulafono a ai? e le o ni Tulafono a le Kapeneta o Tulafono a le Palemene. E aumai i i, e fai ai le latou galuega. O le mea lena o lea ou te tulai atu ai i le faasaoga o lea mea, ona o le taua o Regulations e fai ai galuega, ina ia faatulafono. O fea e faatulafono atu ai? E pasi i totonu o le Palemene lenei.

**FOFOGA FETALAI:** Lelei faafetai o lea ua maua le finagalo.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai...

**FOFOGA FETALAI:** Ou te fautuaina lau Afioga i le Sui Taitai, ua maea lou taimi.

**Tofa Hon Lauofo Fonotoe Nuafesili Pierre Lauofo:** O lena e silafia lelei e lau Afioga, o lau afioga foi o le loia, o le malosia lea e fai ai Regulations e fai mai lalo o le Tulafono Autu. O la e aumai ai le malosia, ma le power lena. Ia faitau i ai.

**Tofa Hon LEALAILEPULE RIMONI AIAFI:** Ia faafetai lava i lau afioga, ua tau pau ma lou ie i faauilavea....

**FOFOGA FETALAI:** Onosai mai lava, se tautuana lo tatou Maota lau afioga i le Sui Taitai, ua tauau ina see ese lo tatou Maota i tulaga faapea. O lea e avatu lava le fesoasoani ia outou, ae a fai foi o le tulaga lea, e le faigofie foi le tulaga e tataua ona tatou oo i ai. A ia outou alolofa mai i le Nofoa ma fesoasoani mai. Ua uma ona avatu le tala a le Nofoa ua uma lou taimi, ia e le toe lagona lou siufofoga, seiloga lava e fai atu le Nofoa.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, i se avanoa. E faamalulu atu lava...

**FOFOGA FETALAI:** Ia alala mai i lalo, alala mai lalo.

**Tofa LEALAILEPULE RIMONI AIAFI:** E faamalulu atu foi i lau Afioga i le Fofoga Fetalai, faafetai atu foi i lau Afioga i le Sui Taitai, a na e tuu mai ou te talia ua leva ona uma.

Lau Afioga i le Minisita, o e manatua... o i pei lava e te le i i ai i le Komiti lea sa faaigoa e le Palemene o le SR, lea na tatou fiu e pasipasi SR ai i, o mea tau Regulations, e oo mai iinei, ou te le i fai atu e le oo mai iinei, o mea uma lava e oo mai iinei, Regulations. Na pau lava le mea e oo mai i



inei Regulations a ua amata ona faatino leaga e faatino e Matagaluega ma Minisita Regulations, ma le Kapeneta. Ae oo mai iinei e review e tatou.

**FOFOGA FETALAI:** Lau Afioga i le sui usufono mamalu, e i ai lou taofi, tatou see ese i ia mea, o le faaaliga o tatou iloa o Regulations ma mea ia mea ia lea ua fai. Agai tonu i le tatou Tulafono lea e i luma o le Maota. O lea ua malamalama le mataupu lea lau Afioga i le sui usufono mamalu.

**Tofa LEALAI PULE RIMONI AIAFI:** Ia, faafetai lava. Leai leaga o lea lau Afioga, vaeane lou fofoga, o lea na saunoa le Afioga i le Minisita, o lea lava e kava i lalo o Regulations mea ia e faatino ai faiga faavae a le Malo mai lava i taimi ia seia oo mai le aso. I lou la talitonuga, ailoga sa i ai se manaoga e toe fai ai se Tulafono faapea, o la e i ai ma manino ma mautinoa. Afai o le agaga o le Tulafono ia toe faaopoopo i ai nisi poloketi ese mai i atinae ia ua uma ona pasia, lelei, o le agaga lena e lelei, leaga tatou te mananao uma e atiae le atunuu. A o le mea foi o lea e avatu ai le fautuaga, ia manino mai, aua o lea e sao le saunoaga a le Minisita o Faatoaga, o mea tau commercialization. I lou talitonuga, o galuega tetele, o le mea lea na tatou talanoa... sa pasia foi e le Palemene lena talu ai le Tulafono Faapitoa mo kamupani e ave mea i fafo, export, e mafai ona waive a latou tax, latou lafoga. Aisea? Ina ia encourage, ia faamalosi tagata e fai mea e ave i fafo. A o le mea e pito i sili ona taua, o kamupani ia e mafaia ona faia oloa e subsidize i oloa ia, ua tele tele oloa mai fafo. O lea la ua oo mai le taimi lena o le faigata, a ia taumafai ina ia uunai tatou pisinisi ina ia mafai ona faatino iinei le tele o mea nei, ina ia mafai ona aua ne i tatou toe faalagolago i atunuu i fafo.

O vaega tonu la ia e tataua ona manino e fesoasoani ane i ai. E le gata ina fua i le aofai o tagata faigaluega e i ai, fua i le tupe o le investment, pe fia miliona le tupe o le a alu i totonu, ia ona fesoasoani lea o le Malo i ai i atinae nei.

Ia, ae o le a taatia ai i le tuualalo, ae pei o lou talanoa atu, pau lava lena o le agaga, o le agaga lava ia o le Tulafono ia manuia ma atinae Samoa. E le o se mea fou le tuusaunoa o lafoga, ma o lena lava sa i ai i lalo o le vaega o le Tulafono e oo mai le aso. Ma le faaaloalo lava.

**FOFOGA FETALAI:** Malo faafetai saunoa. Ia o lea ua matau atu o lea ua fou mai le sa o le sui usufono mai Anoamaa 1.

Ia lau Afioga i le sui usufono mamalu.

**Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa 1):** Faafetai i lau Afioga i le Fofoga Fetalai. Ia, e piiama foi i le tatou faigalotu umi lea na fai nei i le taeao, ae a umi foi, sala ina umi. Tatou te fiu lava e sula le alofa ma le agalelei o le

Atua, e le lilo e le lanu. Ua mavae atu foi ma tuanai atu asuasuvale o le tatou folauga e pei ona aafia ai si o tatou atunuu i faamai, ae faafetai i le alofa o le Atua o lea ua taulu taulu, o lea ua aumai lana faamalologa i lo tatou atunuu. Ua maua tala, faafetai foi i le tofa na ae i le Kapeneta, ia lea ua toe tatala faamoemoe o le tatou atunuu.

A matau foi i ia atunuu mamao ma le vaavaai atu i ai, ia o le mea lava lea o lea e vevesi ai nei le lalolagi, ae faafetai i le tofa, ia o lea ua agai i luma lo tatou sa, aua Samoa ia manuia.

Lau Afioga e le i faia sou manatu ananafi i le tatou Pre-Sitting, ae sa ou nofonofu lava ma mataitu le tulaga o le tatou Tulafono. Ia te au lava ia, afai o le finagalo lea o le Minisita ma le Malo e aumai aloaia i se Tulafono le mea lenei, ou te lagolagoina foi e au. O lea ua ou faitau atu i sini autu o le Tulafono, e faigofie lava. O objectives o le Tulafono lea e aumai ai i i, ia faatulafonoina le tatala tuusaunoa o tiute i luga o oloa.

Ia ma le lona lua, ia tuu le malosiaga i le Komiti e latou te faia ai le pule lea e fai ai le tuusaolotoina o tiute. I le malamalama o si ou itumalo o faafofoga mai, o Tulafono nei, o Tulafono nei e le maua ai se tupe a le Malo, i te i ua faapea po o a nei mea. A o le Tulafono lenei e faatino e le Malo e faatosina mai ai atinae, faatosina mai ai atinae ma nisi o poloketi e ono maua ai tupe maua e manuia ai le atunuu, ae leai se tupe maua leaga o lea o le a tatou nonofo tuusaoloto tiute, e le se mea fou foi la pei ona saunoa nisi o sui usufono, o le mea ua leva. Ae faafetai o lea ua faamauiina i le Tulafono, e faafaigofie ai mo matou nei e le malamalama tele foi i le fausaga o mea o Tulafono.

E pau le mea lea ou te vaavaai atu i ai lau Afioga i oloa ia ua agavaa. Ia ua leva lava ona agavaa pei ona taua e nisi mea o tatou turisi, faletalimalo, ma nisi o mea faapena. Ae o lea ua aumai i totonu i i mea nei o tatou faatoaga ma faigafaiva.

O le mea moni lava leaga o le mea tau tiute lea, ae o faatasi lava le mea lea o le tiute ma le lafoga. O lona uiga o le tagata e agavaa i tiute ia, e agavaa foi e leai ni lafoga mo le fia tausaga lea e faasaoloto atu ai e le Malo mea ia. Not only e duty free ae tax free foi i le kamupani ina ia atiae pea tulaga tau amatamata. Ia te au la ia, toe vaavaai ifo la lau Afioga i le Minisita, leaga o lea o le a tuusaoloto mea ia o le aufaifaatoaga ia, ae ia manatua foi e le o tax ina tatou agricultural products ma tagata faifaatoaga ina ne i moulu mai ai foi se isi i i i mea ia, ona faapea lea e faasaoloto atu ai e fai ma aualea e sao atu ai ma le faiga o lafoga i totonu o mea nei o kamupani nei.

O le matou lea fautuaga i lau Afioga i le Minisita. Ae leaga o lea ua ou faalogo i le Minisita o Faatoaga o talanoa mai i mea ia o poultry farm, o mea o faatoaga na e gaosia ai le tatou fuamoia, o lo o taumafai mai nisi. O mea taua ia, o mea e lelei ia e aoga mo le tatou atunuu. A faapea e manaomia, ave i ai, e lagolago e le matou itumalo le ave i ai, leaga e a? E manuia ai Samoa, e manuia ai lo tatou atunuu, nai lo le tatou toe o i fafo, ia e taugata

le mea lea ua i ai, tuu atu i ai ma le tau o vaa e feaveai ai ma felauai ai, ia ua atili lava le alu i luga o tau o ia mea. Ae afai e i ai ni tagata faapea latou te gaosia, ia ou te talitonu foi o nisi o nei tamalii, e leai ni latou eleele tetele e o ai e fai maumaga. Tatou te le o talanoa la i i i mea ia, leaga e le agavaa ai le aufai maumaga i i i le mea lea. Faamolemole le paia o le atunuu e faamalulu atu, leaga e leai ni eleele. Na o tagata lava o le tatou atunuu o lea e nonofo i eleele tau Samoa, o lena e mafai ona tatou o e atiae mea ia.

Ia, ou te fia talanoa i le mea lea o le Investment Committee lau Afioga i le Minisita, lea ua ou faalogo atu sa fai le tou fonu, ae tatau ona i ai se aiaiga i le mea lea o le umi ona i ai o se pisinisi e agavaa i mea faapea, leaga e tele pisinisi lea ua tatou vaai nei i ai, e pei na ona omai lava e taaalo i le incentive lea, uma toe tapuni lua i le tolu tausaga. E tatau ona tuu i ai se avanoa, a leai e tatau ona toe aumai uma lava tiute a le Malo sa tatau ona agavaa i ai, toe ao mai tupe maua ia a le Malo, leaga e i ai isi pisinisi ia faletalimalo na tatou aveia i ai faamanuiaga ia, lea ua tatou vaai i ai, ua matua faaletonu atu ai lava ma le tele o nisi atinae ma le tele o nisi faaputugatupe a le Malo, talu talu ai, ae o lea na ave i ai mea ia.

Ia, tuuaia ia le mea o le GDP ma na mea, se o le mea lautele le mea lena, a o le agavaa o le pisinisi e toe... leaga e i ai le mea e tau o le pisinisi e tatau ona vaavaai i ai le investment, mo le going concern, po o le a le umi e faatino ai le galuega e manuia ai pea o tatou tagata, ae aua le omai lava na o sina taimi puupuu. E pei e faafoliga mai o le a fofoli mai ni manuia, ae uma ifoga, e faaletonu atu ai ma tatou.

Lau Afioga i le Minisita, ia o nei mea ua toe alu i tua le tatou Tulafono i le 2014, ia o lea lava matou te tatalo atu, e tasi lava foi le vaai a le matou itu ma le tulai mai i lena vaitaimi, e pei e atagia sa i ai se mea faaletonu. Ae mo le faafoliga mai a le atunuu, ia o lea lava ua saunoa le Tamaitai Palemia, e leai se mea o faaletonu, e leai se mea o toe apaapa ai i tua le Tulafono e faaleaga se mea na faia, ia o lea lava ua see i luma lo tatou vaa. Samoa, e leai se mea o faaletonu, mau mai lau tapuaiga o lo o manuia mea uma.

O le matou tuutuualalo lea i le Tulafono lau Afioga i le Fofoga Fetalai. Manuia lau Afioga i le Minisita e ou le Tulafono, manuia le tatou Fono. Faafetai.

**FOFOGA FETALAI:** Faafetai, malo saunoa. Faafetai lava mo lou sao taua foi i le tatou Tulafono le sui usufono mamalu.

Ia o lea ua matau atu o lea ua fou mai le sa o le sui usufono mai Satupaitea. Ia, lau Afioga Lautafi.

**Afioga Hon LAUTAFI FIO SELAFI PURCELL (Satupaitea):** Faafetai i lau Afioga i le Fofoga Fetalai mo le avanoa o lena foi sui usufono. E faatalofa atu i le paia o le malu i lena taeao. E fia avatu ni nai manatu i le tatou mataupu o lo o tatou talanoaina nei. E talitonu foi o lea ua tele lava ina

faamanino atu manatu foi o lenei itu e le i atoatoa atu, ae o vaega ia sa tilotilo i ai.

I le aso ananafi sa ou laga ai le mataupu lea i le naunautaiga lava ina ia aua ne i i ai se manatu foi lea faapea sa i ai se faiga e le i faia i lalo o se Tulafono, po o le Tulafono Autu po o le Tulafono Faatonutonu, a o galuega sa fai mo le mataupu lenei, sa fai i lalo o aiaiga e le o solitulafono. E pei o manatu na o lea sa avatu ai se manatu ananafi, ona e le o manino mai.

**FOFOGA FETALAI:** Malie le saunoaga a le sui usufono mamalu ua uma ona ou taua le upu lea, aveese le lagona lea faapea na tau le upu lea o le solitulafono. E le o i ai se agaga faapena o le Tulafono ma le Malo, ia tatou aloalosa i ia tulaga leaga o lea e faafogafoga le atunuu. Na pau lava le uiga o le Tulafono e pei ona ou fai atu, ia faalauleleia mo le agai i luma. Na pau lava lea. E le o i ai lava se mea faapena a mea ua a. O le mea lea e faamalulu atu i sui usufono, tatou tuusao a tatou saunoaga i le Tulafono ma le agaga o le Tulafono e pei ona i lumamea nei o le Maota. Ma le faaaloalo.

**Afioga Hon LAUTAFI FIO SELAFI PURCELL:** Faafetai i lau Afioga. Ia atonu e le o se solitulafono, a o lea la o mea sa le laulelei o lea ua faalaulelei. O le uiga la lena, o nai mea lea e faapea ai sa taupatupatu, a o lea o le a faaleleia i le tulaga. Faafetai i le Minisita.

O lou lava talitonuga ona o mea nei, o duty concession nei, pei ona saunoa se tasi o sui usufono, o vaega uma lava nei o le taumafaiga a le tatou Malo ina ia faatosina mai i latou e omai e faagaluaeaiina a latou tupe i inei. This is just one part of the Government's initiative to draw investors to Samoa. E le na pau lea, e tele isi mea lea e i ai foi i i, lea sa taumafai i ai le malo. O le naunautaiga lava, ia omai tagata e faafaigaluega a latou tupe i inei e atiae ai Samoa i mea o lo o manaomia e atiae. O latou la e omai, e le faapea e omai foi lea e faatalale le latou omai. O isi vaega la e i ai, seiloga e ova i le \$1 miliona a latou tupe e omai invest. E le faapea la na ona omai lava tilotilo atu fai mai e omai e fai le hotel omai loa, ia, omai, omai e fai le tou hotel o le a avatu mea ia. E leai. Ma e sa matua maumautu lava faiga faavae lau Afioga i lalo o Tulafono Faatonutonu, lalo o Tulafono Faatonutonu. O la e aiaia uma ai lava qualifying projects, qualifying goods, o ai ituaiga tagata e tataua ona tilotilo i ai. E le faapea foi e tamau ni mea, o lou popolega lena, i fai Tulafono nei ona tamau ai lea ua mausali ua le mafai ona gaoioi le Investment Committee i ni mea e mafai ona tilotilo foi i ai ae aumai ai foi nisi tagata e fesoasoani i le atinae o le tatou atunuu. O lea lava e lelei regulations lea sa i ai. Afai la e sui pe afai e sui, aua o lea ou te le iloa po ua sui, tataua la ona i ai ni Regulations i lalo o le 2014, e toe faamatala uma mai ai lava faiga ia na sau ai, aua e leai se mea o faaletonu.

Ua ou vaelupeina le saunoaga a lau Afioga i le sui usufono mamalu, talu ai o lea ua tatou oo mai i le tatou taimi o le tatou malologa masani, faaauau lau

saunoaga pe a tatou toe taliu mai. E faataatiaese galuega a le Fono Aoao Faitulafono mo lana malologa masani.

*Na faataatiaese Taulumaga a le Fono Aoao Faitulafono mo lana malologa masani i le itula e 10:45 i le taeao ma toe faaauau i le itula e 11:18 i le taeao.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoao Faitulafono.

I le toe taliu mai ai mai le tatou malologa, ia ua matu i fau le tautega ma le taligasua i le paia o le Maota. E i ai le manatu ua maua se faasiligamalosi mo le faaauauina o le tatou galuega. Malo faafetai.

Ou te tapa lau Afioga i le Palemia mo le lafo.

### **LAFO MO LE SUIA O ITULA FONO**

**Afioga Hon FIAME NAOMI MATAAFA (Palemia):** Lau Afioga i le Fofoga Fetalai, ia ua faalogologo lava ma le manino i le saausi o saunoaga a le Maota i lenei taeao.

Ae ua tulai e faatu le lafo mo le suia o tatou Itula Fono e faapea, *Ina ia faataatiaese a tatou Tulafono Tumau 32(1) mo le suia o a tatou Itula Fono mo le aso e faapea: o le a faaauau pea le tatou galuega seia aulia le itula e 1:00 i le aoauli ona faataatiaese lea mo se malologa aemaise mo le faamoemoe mo le tatou tuiga e pei ona saunoa i ai lau Afioga i le taeao nei. Ona tatou toe tauaofia lea i le itula e 2:00 i le aoauli ma faaauau seia maea le lauliliuina o tatou Tulafono Tau Faaofi o lo o i ai i le Pepa o Galuega i le aso Fono lenei.*

Ma le faaaloalo lava.

*Faaluaina e le Sui Palemia ma le Minisita mo Faatoaga ma Faigafaiva.*

*Na faamaonia le lafo.*

**FOFOGA FETALAI:** O le a faaauau le tatou galuega e tusa o le lafo ua faamaonia.

E faataatiaese a tatou Taulumaga mo le malologa o le taeao o lo o saunoa le sui usufono mai Satupaitea. Ou te tapa le sui usufono mamalu e tulai mai mo le faaauauina o lau saunoaga.

**Afioga Hon LAUTAFI FIO SELAFI PURCELL:** Faafetai i lau Afioga i le Fofoga Fetalai, atonu ua saoi alo foi le taliga o le sua mo se faamalositino i lau Afioga ma le mamalu o le Maota. E momoli atu le faafetai i le Ofisa o le Fono mo le latou galuega faifaiepa aua le tausiga o le tatou fonotaga.

Lau Afioga i le Fofoga Fetalai, e ta le malologa ua oo atu se faamatalaga i ni manatu lava o lenei sui usufono, lenei foi Itu e tapue ai le faamoemoe. Ua oo atu foi le tele o manatu. Ae pei o manatu ia sa ou tau oo i ai i le faafaigofie o le ofi mai o i latou e aumai a latou tupe faafaigaluega i Samoa. A silasila foi i le auga lava o lenei Tulafono, o poloketi e aumai e fesoasoani malosi i le atinae o le tatou atunuu. O i ina e o i ai finagalo o i latou e faia le faaiuga.

I lalo foi la o le Tulafono ma lalo o le Vaega 163A o le Tulafono Tumau, o lena foi e manino mai ai lava, lena e manino mai ai poloketi e agavaa, o a foi mea e agavaa ai, o a foi puipuiga, o lea sa i ai ni manatu i te i ua le malupuipua. Leai, o lo o malupuipua uma. E i ai foi le avanoa e mafai ona tilotilo i nisi poloketi pe afai e oo atu i lena taimi o lo o talafeagai. O le lalolagi lenei tatou te ola ai, e fesuisuia, aemaise foi tatou iinei i Samoa e aafia soo i faalavelave faafuasei. E le mafai la ona tamau i se Tulafono e mausali ai, seiavagana e fai faalelei la ni teuteuga o le Tulafono Tau Faaofi, pei la o le mea lea e i ai nei. O la e i ai avanoa. Afai e silasila atu le Komiti, ave le fautuaga i le Matagaluega, ave le fautuaga i le Minisita, ave le fautuaga i le Kapeneta, o i ina la e aumai ai. E leai la ni mea e popole ai i te i ua faapito i se isi itu pe tilotilo i se isi itu, leaga o le auga lava latou o le Tulafono lea, ia auai mai agaga o latou e fai atinae tetele nei.

E le o faagalo ai la a tatou foi atinae laiti pei o lea sa talanoa muamua. E i ai foi Tulafono ma fesoasoani mo i latou ia i le taimi lenei, ae le tuua ai le apalai pea i luga i le Tulafono tele lea, i le vaega lea e tele le fesoasoani i mea tau concession. Ou te manatuaina na i ai pe lua kamupani tetele, e le masani ona eligible i i, ae na avatu talosaga ma avatu fautuaga lea na talia e le Kapeneta lea na tea nei. Lea la ua outou silasila i ai, ua i ai ni atinae tetele lava, atinae tetele, e lava ai le sapalai mo tatou tagata, aemaise lava mea nei se i tulou, o fuamoa ma moa ma tulaga faapena, na fesoasoani i ai le Malo e aumai masini, aua e le o ni masini e maua lata mai ma e le faapea o ni masini e aumai fau iinei. O le agaga lena o le Tulafono lenei.

O le fiafiaga sa i ai, o le faigofie ona fai, faigofie ona aumai, tilotilo, tasi, e fetau uma mea ia, ave loa i le Kapeneta ia maua se fesoasoani, ioe, o lea e fetau ma fuafuaga a le Malo i le agai i luma, le atinae o lona Malo, aumai le atinae lena o lea e manaomia. O le popolega, i over regulate le tatou faamoemoe lea, e mumusu ai tagata e omai. O le talitonuga, keep it simple. O lea lava e i ai tatou Tulafono Faatonutonu, i lou talitonuga o lea lava e galulue ai i lalo, seiavagana ua faapea mai o le aso lea na repeal ai regulations ia ona fai lea o se isi faiga. Ae afai o lea e i ai le finagalo o le Malo e sui le faaupuga o le Tulafono, e tataua la ona i ai se Tulafono Faatonutonu e tauave mai le 2010, ona faaauai ai lea o tatou.

O lau fesili lea na fai atu ananafi, po o le a le mea ua gata ai i i, ona toe oso mai lea i le 2014, ae faapefea la le va lea? E le mafai ona i ai se taimi e leai ai se Tulafono po o se Tulafono foi lea Regulation e aiaia ai ni gaoioiga a tagata o le Malo. O le mea lena na ou tulituliloa ai ananafi pe i ai se mafuaaga ua faapena ai.

O ni manatu foi faapea pe i ai i le matou vaega lenei sa i ai pei na faapea, ia o outou na tou te iloa po o ai na faafiafia a o ai... se tulaga faapena, ia, ou te tautino atu lava au ia, e le i i ai ni tulaga faapena sa faia i lalo o Tulafono sa gaoioi ai. E galulue ma le faamoemoe e faatuatuaina i latou ua tofia i Komiti.

A silasila foi i le Komiti lea...

**FOFOGA FETALAI:** Ia, malie le sui usufono mamalu mai Satupaitea se i tuu atu le avanoa i le Afioga i le Tamaitai Palemia.

Se i tulai mai lau Afioga i le Tamaitai Palemia.

**Afioga Hon Fiamē Naomi Mataafa:** Lau Afioga i le Fofoga Fetalai, na o le pau lava le mea e fia faamalalalama i le mea lea ua oo i ai le saunoaga a le sui usufono mamalu mo Satupaitea i le faafiafia, lau Afioga, o le Sui Taitai o le Itu Agai, o ia lena sa saunoa i le faafiafia. Ia ai ona pe ese le faaiuga a le Kapeneta sa i ai, ese se lagona o le Sui Taitai.

**FOFOGA FETALAI:** Ia masalo o lea ua maua mai le agaga o lau Afioga i le sui usufono mamalu mai Satupaitea.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, e manatu lava o la e lagona o le malie, ae le o le faafiafia.

**FOFOGA FETALAI:** Ia, o le mea foi lena o lea na ou tau fai atu ai. E le o le faafiafia, o le faamalie. A o le Sui Taitai o le tou Vaega na taua le tulaga lea. Ia, ma le... ia saunoa le sui usufono mamalu.

**Afioga Hon LAUTAFI FIO SELAFI PURCELL:** Ia, faafetai. Po o le faamalie po o le faafiafia, atonu lava o le mea lava e tasi. Ae na pau le agaga lea sa taumafai atu ai, ne i faapea ai o le Tulafono lenei sa galulue ai le matou faigamalo, sa i ai ni avanoa e faafiafia ai nisi pe faamalie ai nisi, ae le i faamalie ai nisi. Ia aua e pei ona fai atu, o le lalolagi lenei tatou te ola ai, e eseese finagalo o tagata, ae sa fai ma le faamaoni le galuega, e oo lava i le taimi lenei, e fai lava ma le faamaoni. O lea foi matou te tutu atu lava i i, e fai lava ma le faamaoni le tuualalo atu ma avatu foi ni nai fautuaga aua le tatou vaa e fautele. O le agaga lena o lea e taumafai atu ai. Ae pei ona ou fai atu, o le tele ia o isi fesoasoani a le tatou faigamalo e fesoasoani i isi, aufaifaiva, aufaifaatoaga, o tamai manufactures laiti, lea e i ai uma lava i

totonu i i. I te i ua faapea mai, ai ua tatou o na o vaega foi nei e tele tupe ma... E leai, e manatua uma lava atinae laiti uma a le tatou atunuu, tagata uma lava o Samoa e i ai fesoasoani a le tatou Malo lea na tuu atu nei, ae talosia o le a faaauau pea e le faigamalo o lo o tulai mai nei.

Lau Afioga, na pau lava lena o nai manatu, se i tilotilo pe tataua pea ona fai lenei Tulafono po ua lava ia Tulafono sa i ai. E i ai foi le upu faapapalagi foi lea, if it ain't broke don't fix it. A leai se mea o faaletonu, tuu ai pea. Lau Afioga ma le faaaloalo.

**FOFOGA FETALAI:** Faamalo saunoa. Faafetai tele i le sui usufono mamalu. O le mea sili ua saunoa manino lau Afioga i le sui usufono mamalu, e faamalulu atu e le o le itu lea na taua e le Sui Taitai.

O le mea lea, e faamalulu atu ai i le saunoaga. Ia o le mea lea, malo saunoa. Faafetai foi le faasoia i le tatou Tulafono.

Ia, o lea ua matau atu o lea ua fou mai le sui usufono mamalu mo Siumu, ona sosoo ai lea ma lau Afioga i le sui usufono mo Faasaleleaga 5.

**Tofa Hon TUUU ANASII LEOTA (Siumu):** E momoli atu le faamalo ma le faafetai i lau Afioga i le Fofoga Fetalai, ua maua foi se avanoa e fai ai sina manatu puupuu i lenei Tulafono. Masalo e le faigata le Tulafono Tau Faaofi e pei ona faataoto mai, o lea foi ua saunoa nisi o sui usufono, ae i ai lava le talitonuga, e leai se faigamalo e manatu e fai ni mea e le manuia ai le atunuu. O tulaga foi pei ona faafofoga mai lau Afioga i finagalo faaalua foi o lenei Vaega, ia, e silafia lava e lau Afioga nei mea o Vaega Faaupufai Itu Agai.

Ae ona o lea sa fai ma taua e sui usufono o le matou Itu i matou foi faapea sa i ai i ia taimi, masalo na o le Afioga i le Tamaitai Palemia sa ma i ai i le Kapeneta i le 2004 i le 2011, sa ou seei ai la i le Minisita lea pei ona faataoto mai ai le Tulafono Tau Faaofi lenei. Ma e fai foi si feoloolo o Tulafono na ou tuuina mai i le Palemene e uiga lava i teuteuga nei. Mo le silafia foi e lau Afioga, e pei lava ona avatu foi le... e manatu lava sa galulue lava e fai ina ia manuia le tatou atunuu i mea uma ia sa aumai ai le Tulafono lenei mo fesoasoani i atinae ia pei ona faataoto mai ai ina ia manuia le atunuu.

O le mea lea, faamalo i lau Afioga i le Minisita, a faapea o le finagalo lea o lau Afioga, ona o tulaga lava ia e aumai pea, aumai pea lava pea teuteuga o le Tulafono lenei ina ia talafeagai ma le taimi. Pe afai o le finagalo lea o lau Afioga aemaise foi o le faigamalo, e leai se mea o le a afaina ai, aua o lea foi matou te talitonu, o le mea foi lena sa i ai lenei Vaega, e naunautai lava ina ia manuia le atunuu.

O lea la, ou te le toe fia talanoa lava i mea ia o Tulafono Faatonutonu po o a vaega uma ia pei ona manino foi i le saunoaga a le Sui Taitai o lenei Vaega, ia o le agaga lava lena. Ae pau lava o le taumafai atu, ona o le vaega lea ua toe toso i tua i le 2014. O le a ou le taua le upu lea ua e faasaina aua le taua



o ni agaga foi lea faapea a i ai ni mea sa faatinoina e le talafeagai, a o lea ua silafia lava e lau Afioga ma le faigamalo, leai o lo o tonu lava pei ona aumai le finagalo o le faigamalo, ia faataoto i lagotonu vaega ia, pei ona aumai ai le faamoemoe o le Tulafono ia i vaega uma lava ia ina ia manino foi ma malamalama. E le o i ai la se agaga faapea o faatautee, leai, o lea foi matou te talitonu o lo o i ai foi le tou agaga ina ia manuia le atunuu.

Na pau lava le agaga ina ia faamolemole, ia talia mai foi tuualalo ma fautuaga o lo o faapena ona tuu atu e lenei Vaega. E tou te silasila i ai i vaega ia pei ona avatu ai vaega o mea sa tutupu, po ua mautinoa foi ma manino foi i le silasila a lenei foi Itu i le vaitaimi o tulai mai foi i le faigamalo.

Ae ua ou faatauaina le tulai mai o le Afioga i le Minisita o Faatoaga i le commercialization ma le mechanization. O le tulaga lea ua tele alo foi ma fanau o le leipa, atonu o le vaega lea malolosi o tupulaga mo le galulue i tatou faatoaga. Atonu e aoga la le mea lea o le mechanization e fesoasoani i le vaitaimi lenei. E lagona lava lota fiafia i le Afioga i le Minisita o le malosi, matagofie foi lona kiliva maia o vaega ia ina ia faamalosi ai le atunuu i vaega eseese e pei ona ia tuuina mai e tatou te o e atiae le atunuu. Na pau lava lona lau Afioga i le Fofoga Fetalai. Ia, o le manatu lava pei ona ou tulai atu, o le agaga lava ia tatou te galulue faatasi ina ia manuia le atunuu, ma e i ai foi le manatu e le o i ai se agaga e faatautee foi i vaega uma e aumai ai se finagalo, leaga o lea foi sa matou i ai i o, manino ma malamalama i finagalo faaalii foi o le Kapeneta i mea e aumai i le Palamene lenei, o mea moni ma le sao ma le amiotonu ia manuia ai Samoa.

Ia, lau Afioga, o sina faamatalaga puupuu lea. E avatu le faamalo ma le faafetai i lau Afioga, ae ua talia foi e lenei itumalo Tulafono pei ona faataoto mai. Ia manuia le Fono.

**FOFOGA FETALAI:** Malo faafetai saunoa i lau Afioga i le sui usufono mamalu mai Siumu, malo i le tofa, o lea foi ua aumai lau faasoa ma lagolago foi le tatou Tulafono. Ia malo faafetai.

Ia o lea ua maua atu o lea ua fou mai le sa o le sui usufono mamalu mai Faasalelega 5. Ia lau Afioga Peseta.

**Afioga PESETA VAIFOU TEVAGAENA (Faasaleleaga 5):** Faamalo faafetai i lau Afioga i le Fofoga Fetalai ua maua le laolao o lenei sui usufono e fia molimoli atu ai foi se manatu i le Tulafono Toe Teuteu. Atonu o lea ua tele finagalo ua faaalii i nisi o mataupu ua malamalama ai foi lou sui usufono. Ae laitiiti lava nai vaega ia ou te fia faafesiligia ai lau Afioga i le Minisita e ana le Tulafono ina ia manino ai le tatou Maota, o le tulaga foi lenei, aua o lea ua vaai atu ua tuu lava le avanoa i so o se kamupani. E faapefea kamupani foi nei pe na o le toavalu tagata faigaluega pe toafitu, a o building materials po o equipments po o masina nei ua talosaga mai ai lea kamupani mo le incentive with \$200 million, ae 10 tausaga bankrupt pe toe

faatau atu, o i ai se tulaga foi lenei o tilotilo i ai le tatou Malo ina ia bind le kamupani lea ma le Malo ona o ana tupe ia, lafoga ia ua aafia i totonu o le incentive, ina ne i alu alu le tuu atu o le avanoa lenei i so o se kamupani.

O se faataitaiga o le kamupani lenei o le Yazaki, ona sa au tagata faigaluega i le 3,000 tagata faigaluega a le Yazaki, ae sa faamoemoe lava le tatou Malo sa i ai i lenei taimi i lafoga a le toatele o tagata faigaluega, pei o i lea sa maua mai ai le seleni a lo tatou Malo, lea na mafua ai ona tele le incentive na ave i le Yazaki. E moni la ua le toe i ai le kamupani lea, a ua tele tausaga sa galulue ai le mamalu o le tatou atunuu.

A o le uiga o lau faamatalaga lea e tau faafesiligia ai lau Afioga i le Minisita, silasila ane i kamupani pe na o le toasefulu tagata faigaluega pe toafitu, a o le talosaga lea o le a aumai o masini po o equipments e faaaoaga e se kamupani fou e sili atu i le \$100 miliona. Tilotilo laia i le lafoga a le tatou Malo sa tatau ona maua mai le tau o na oloa, ae pe 7 tausaga pe 6 ae toe faatau ese. Aua o le mea moni lava, o le a faatau ese e le kamupani lea i se tau maualuga atu ma tuufaatasi ai ma tiute o oloa ia sa sau i lalo o le incentive.

Ia, pei o se manatu lea lau Afioga i le Fofoga Fetalai, atonu o se tulaga e toe silasila i ai lau Afioga i le Minisita. E tatau la ona i ai se feagaiga a kamupani nei e talosaga mai i le incentive ma le Malo, tuufaatasi ai le resitalaga o le kamupani lenei ma le Malo, ae po o le a foi se taimi e fai feagaiga ai le kamupani ma le Malo pe 20 tausaga ona mafai ai lea ona faatau ese ae faamagalo tiute. Ae afai na o le tolu tausaga, lima tausaga ae toe faatau ese e lea kamupani ae sa tatau ona maua e le tatou Malo le \$100 miliona o le tiute, ia pei o se tulaga lenei lau Afioga i le Minisita e toe silasila ane i ai i le tulaga lenei.

Ia na pau lea lau Afioga i le Fofoga Fetalai, na ona faamanatu atu, o lea ua uma ona saunoa le toatele o sui usufono foi o lenei Itu i nisi o vaega. Ia ma lou faaloalo lava.

**FOFOGA FETALAI:** Malo faafetai saunoa i lau Afioga i le sui usufono mamalu mai Faasaleleaga 5. Ou te talitonu o lea ua faafogafoga atu le Afioga i le Minisita o se taimi ona faailoa atu lea o lona finagalo ma le tulaga o i ai le Malo.

Ia, o lea e matau atu o lea ua fou mai le sa o Sagaga 2. Ia tulai maia le sui usufono mamalu.

**Susuga MAUOLO TAVITA AMOSA (Sagaga 2):** Faafetai i lau Afioga i le Fofoga Fetalai mo le avanoa. E momoli atu foi le faamalo i lau Susuga i le Minisita e feagai ma lenei mataupu. Ou te manatu o lea ua tele ina manino. E toe pau lava si vala lea e fia faafesili atu ai, o le Fuaiupu 3 o lo o faapea mai; aiaiga faasaoina ma aiaiga tau soloaiga. Muamua, o so o se faaiuga na faamaonia e le Minisita o Tupe e amata mai i le tausaga e 2014,

na faia i luga o le fautuaga a le Kapeneta mo le faamatuuina atu o tuusaunoaga mo tiute o oloa ua faamaonia mo se galuega tau atinae ua agavaa e aloaia e faapei ai na faia i lalo o lenei Tulafono. O le vaega mulimuli lava lena o lea ou te fia faafesili ai.

**FOFOGA FETALAI:** Lau Afioga i le sui usufono mamalu, e lelei pea le fautua atu pea o le Nofoa. E le i oo i le taimi e auiliili ai le tatou Tulafono, o le lauga faalauaitele lea e tatala mo le taimi lenei. Ae i ai lou avanoa, a oo i le taimi e auiliili atu ai...

**Susuga MAULOLO TAVITA AMOSA:** Faafetai, se ua seetia foi i le vaai atu faapea ua faanatinati, ua popole ne i te i ua le maua se avanoa.

**FOFOGA FETALAI:** Ia, o lea e maua lou avanoa...

**Susuga MAULOLO TAVITA AMOSA:** Ae ui i lea, ia lena ua faaila atu foi i le Afioga i le Minisita le fesili. Faafetai.

**FOFOGA FETALAI:** Se i tulai mai lau Afioga i le Minisita pe i ai se mea o e fia saunoa ai?

**Afioga Hon Tuala Tevaga Iosefo Ponifasio:** Faafetai lava i lau Afioga i le Fofoga Fetalai mo le avanoa. E matau atu o lo o tulai mai pea le tele o sui usufono ma agai i le Tulafono o le 2014 lau Afioga i le Fofoga Fetalai. E i ai se taimi ona faamalamalama atu lea, o le a ou toe tulai atu ma faamanino tulaga i le mafuaaga ua ala ai ona toe toso i tua pei ona saunoa ai nisi o sui usufono. O le a le mafuaaga ua ala ai ona toe tuu i tua lenei mataupu mai le 2014. O se taimi lau Afioga ona faamanino lea o lea tulaga. Ma le faaaloalo lava.

**FOFOGA FETALAI:** Faafetai. O lea ua manino le sui usufono mamalu, o lea ua faamau lelei e le Afioga i le Minisita, o se taimi ona tali mai lea, ona o lea e fai ma agai i tua a outou saunoaga, ona tatou malamalama ai lea. Faafetai i lau Afioga i le sui usufono mamalu mo Sagaga 2 mo le saunoaga, e maua lou avanoa pe a iloilo auiliili le tatou Tulafono.

Ia, o lea ua matau atu o lea ua fou mai le sa o le sui usufono matua o Faleata 4, le Tofa i le Igoamatua lau Fetalaiiga Ale.

**Tofa ALE VENA ALE (Faleata 4):** E momoli atu le agaga faafetai i lau Afioga i le Fofoga Fetalai, ua maua se avanoa o lenei sui usufono aua foi le mataupu ua lauliuina nei e le tatou Maota o le Palemene i lenei taeao. Ua tatou i ai faatasi ma le taulaga pei ona molia e lau Afioga i le Fofoga Fetalai i lenei taeao aua le Atua ma Lona agalelei ma Lona alofa ua faataunuuna ai

ma le manuia lenei taualumaga a le Palemene, aemaise foi le soifua manuia o sui usufono uma ua tatou auai faatasi i lenei taeao. Ou te ofo alofa atu foi i lau Afioga i le Fofoga Fetalai, malo le faapalepale, malo foi le faatoatoa, ia malo foi le onosai i le tau faafoeina o le maemaea foi o tatou sui usufono o le Palemene i lenei taeao. Ia, o le faiga lava ia o upufai o Malo, ae malo faafetai i lau Afioga i le Fofoga Fetalai le toa pea o le tofa i lau Afioga aua le faafoeina o le tatou fonotaga.

O paia faale-Malo, ia, tulouna ia paia faale-Malo, paia faale-atunuu aemaise paia faale-Ekalesia i so o se fatafaitaulaga ma le tapuaiga mamalu a le tatou atunuu, e faapea foi si ou itumalo.

E ofo alofa atu foi i lau Afioga i le Tamaitai Palemia ma Minisita o le Kapeneta, e faapea foi Minisita Lagolago ma lenei foi Itu i le afio atu o le Sui Taitai ma le Vaega Faaupufai foi i lenei Itu aemaise sui usufono mamalu o le Palemene.

Le tapuaiga a Ofisa Sili o Pulega o Matagaluega, ia malo lava le auai mai foi aua le tautuaina o le tatou atunuu.

O le a i ai se taimi lau Afioga i le Fofoga Fetalai ona tuuina atu lea o se manatu o lenei sui usufono i le tatou Tulafono ua i lumamea nei o le Maota, ae ou te fia avea le avanoa lenei ou te fia talanoa ai i le Tulafono lenei o le LTRA 2008. Lau Afioga pe a i ai se faatagaga a lau Afioga, afai e leai, o le a ou agai tonu loa i le tatou Tulafono meamanu o lea ua maua le avanoa. Faafetai.

**FOFOGA FETALAI:** Ou te faamalulu atu i le sui usufono mamalu, e leai e le o i ai le LTRA i totonu o le tatou Pepa o Galuega. O le mea lea, faataatiaese lena Tulafono ae agai sao i le Tulafono lea, leaga e tataua ona toe aumai i totonu o le Maota lenei e toe fai ai, o lea e tele le felautoai o le atunuu.

Lau Afioga i le Tulafono Tau Faaofi ua i lumamea nei o le Maota, e tasi lava le itu lea ou te fia tautala i ai i le Tulafono lea, ona o le itu lea o le a maua ai le avanoa o le Komiti e tuuina atu ai le malosiaga e faalatele ai ma isi mataupu ia e lau mai, and other developments. E i ai le manatu lau Afioga i le Fofoga Fetalai, e lelei ona faamautinoa mai e le Afioga i le Minisita po o a tonu lava atinae o le a faamatuu saunoaina i ai faamanuiaga nei, aua a i ai loa i totonu le faaupuga lea and other developments, ua i ai le malosiaga atoatoa o le Komiti, so o se talosaga lava e aumai i totonu, o le a mafai i i le avanoa lea ona faamatuu i ai faamanuiaga ia o le a... E pei o le agaga lena, a o le Tulafono ia, ua taliaina ma le... aua o lea lava ua i ai le Tulafono Autu, a o le Tulafono Faatonutonu, lea foi ua toe aumai nei e le Afioga i le Minisita. E pau lava lea o le itu o lea e popoe i ai, ina ne i faaoga e le Komiti le avanoa lea, in other developments, o lona uiga, o le a laatele lava. So o se talosaga lava o le a faamatuu lava i ai faamanuiaga nei, ae tataua ona aumai

se i specific mai, o a tonu lava atinae e ave i ai faamanuiaga nei. Ia manuia tele le Fono lau Afioga. Faafetai.

**FOFOGA FETALAI:** Malo faafetai. Ia manaia foi le faafesili, atonu o lea o le a saunoa atu le Minisita i se taimi, ona malamalama ai foi lea o lou finagalo, ae malo lava mo le faaso.

Ia o lea ua matau atu o lea ua fou mai le sa o Gagaifomauga 1, le sui usufono mamalu Faimalotoa.

**Tofa Hon FAIMALOTOA KIKA STOWERS AH-KAU (Gagaifomauga 1):** Faafetai tele atu i lau Afioga i le Fofoga Fetalai mo le avanoa o lenei usugafono. E pei foi ona ua maea ona saunoa le toatele o sui usufono o lenei Itu ma avatu foi o latou finagalo. O le a lava le mea lelei e faatu mai, ia o le a le mea e tuu ai ae tatou o e lagolago.

Ae e i ai lava si tamai mea lea ua ou confuse ai lava anapo, na ou faalogologo ma le totoa i le tatou Presitting ananafi. Faafetai i lau afioga i le Minisita ma le Matagaluega. Faafetai foi i le tamaitai ACEO sa faamalamalamaina mai ia le Tulafono, ona ou nofonofo lava lea ma ou mafaufau atili i ai, ma ou talia ai i ina i se lagona foi lea, o le mea e lelei e manuia ai le atunuu, e tataua ona lagolago.

Ae peitai, o anapo o la e lava ou te matamata i le faigalotu la e sau i le TV mai i fafo a le isi faifeau, ae faapea mai ia lau granddaughter, o a ea se kou mea o fai i le Palemege ga o mea lava faalekulafogo ae ga e ke i ai a? Ia o au la ia ou te le o amanaia lava o la e lava e matamata. Ou fai atu, ae fai mai tilotilo foi i le mea lea.

Ia o tamaiti aoga lava ia sa i fafo ma faalogo mai foi i fafo i mea sa tutupu i le la tausaga ia o lena. O lea la na ou tago faamau ia upu nei, o le agaga lea ou te manao i ai lau afioga i le Fofoga Fetalai, faafetai tele i mea lelei e faatulai mai ou te lagolagoina o la e faafofoga mai ia si ou itumalo mo le manuia lautele. Ae ia tasi le faamatalaga e tatou te faalogologo i ai.

O lea la na ou alu ma le filemu ananafi e le i faia sou manatu. Ua ou malie i le mea lea na fai mai ai e ui lava foi ina... ae na ou faamauina upu nei, o le Polokalame o le Soalepule. O lea lava ou te tusia i i, i te i faapea o ni au upu pe ua ou faaopoopoina, ou tago loa faalogologo ae tusi. I le taunuu atu o le Vaega Faaupufai lea i totonu, o lona uiga o le faigamalo fou, e leai se Tulafono o i ai. O lona uiga, sa fai uma lava i luga o le ea mea uma ia sa fai i le mataupu lenei.

O lea la faatoa teuteu nei le Tulafono ae lea sa fai muamua e leai se Tulafono, e fai ai se faiga faavae fou, e faatulafonoina ai Talosaga uma ia sa fai muamua. O le mea taua, o lea ua faatoa fai ia le Tulafono, ma avatu ai loa ma se auala, e amanaia uma ai isi faaiuga, ua uma ona fai i lalo o le mataupu lenei.

Faamalulu atu lau afioga o le a ou nofo i lalo...

**FOFOGA FETALAI:** Ia ou te fesoasoani atu i le sui usufono mamalu, leaga o lea ua matau atu o lea ua faalau mai lau fasipepa na e maua mai i se tasi, i le tulaga lea. E mafaufau foi i le mamalu o le tatou Palemene ma le tauaofiaga ma mataupu talanoaina, ina ne i o tatou see atu i tua ma o tatou aumaia ni faamatalaga i tua ia ae e le o aafia i totonu o le tatou Palemene. O lena e malamalama lelei lava ia tatou Tulafono Tumau, e tapa foi ia mau tusitusia ma aumai mau ia ona talanoaina lea i le Palemene.

Ia ae ua i ai le manatu, o lau afioga foi o le sui usufono mamalu sa e seei foi i le Kapeneta. E i ai foi le faaeteetega o le Nofoa i le tatou talanoa i tua atu, ia ae ua avea lea ma afaina i le agaga o le Tulafono, ia aemaise o tatou mataupu o lea ua i lumamea nei i le Palemene. O lau fesoasoani atu lena lau afioga i le sui usufono mamalu, manaia le amataga o le saunoaga ae peitai o lea ua maua mai ne i te i ua tapa ni mau ia ona tele ai lea o le tatou galuega.

Ae tuutuu mai i luma le saunoaga a lau afioga i le sui usufono mamalu.

**Tofa Hon FAIMALOTOA KIKA STOWERS AH-KAU:** E faamalulu atu lava i lau afioga i le Fofoga Fetalai, e ese ma lou usitai i lau afioga ma ou te fefe o oe o le pule o le Maota. O le a le mea e te saunoa mai ai o le mea lena e fai.

O lea ou te uuina le telefoni o lea e i ai i totonu ia le Polokalame lea. O lea na ou tago i lou faalogo ai ma tusi ai upu ia. E pau lena o le mea lea ou te manao i ai, ina ia tasi. O le mea ua o tatou aumai i totonu o le Palemene, o lea foi sa ou talitonu lea sa faamalamalama ananafi, a ou Faalogo loa i le mea lea anapo, ia o lea la ua ou Faalogo atu i le tatou... ae e le toe i ai se manatu e lagolago e lou sui usufono le Tulafono pe a fai o lea ua o tatou tilotilo o se mea lelei mo le manuia lautele o le tatou atunuu.

Ia faafetai tele ia pe a e faatagaina au ou te savalivali atu i lou Ofisa e ta te matamata i le Polokalame lea, ia e talia ma le faafetai leaga ou te popole tele ne i te i ua aumai sou faasalaga e lau afioga, ao lea ou te talanoa atu i le mea ua uma ona Faalogo i ai. O lea la ua ua uma ona tusi mai ai faamatalaga ia ma le agaga faafetai. Manuia le tatou Fono.

**FOFOGA FETALAI:** Ia malo, faafetai. Ia e faafetai foi i le sui usufono mamalu o lea ua e maua mai ia le agaga o le Nofoa. Ia o le faaeteetega lena, e manumanu foi leaga ua uma ona folasia ia le agaga o le Tulafono ua saunoa i ai le afioga i le Minisita. O le ala foi lena o lea e taumafai ia le Nofoa e taotao atu i tulaga mamalu ia. Ia ae peitai ia o tulaga ia, ia o lea ua ou faamalulu atu i le sui usufono mamalu, e le o faatagaina i lenei taimi i tatou felafolafoaiga tulaga ia.

Ia ma e i ai foi le manatu...

**Afioga LEAANA RONNIE POSINI (Safata 1):** Lau afioga i le Fofoga Fetalai...

**FOFOGA FETALAI:** Ae i ai se mea e fia saunoa i ai, e te faauilavea i le sui usufono...

**Afioga LEANA RONNIE POSINI:** E leai lau afioga ua maea le saunoaga a le sui usufono e fia faaali foi ia se manatu o lenei itumalo i le Tulafono.

**FOFOGA FETALAI:** Ia se i maea atu ia le faamatalaga lea e tau fuafua atu, ia ae o le tulaga lena ua e silafia le sui usufono mamalu. Ia ou te talitonu foi o le tatou galulue mo le agai i luma.

Ia e le o toe i ai lava se mafaufau e tatou toe tepa i tua, e tatou te galulue faatasi aua le atunuu. Ia manaia foi le tofa ma le saunoaga, ou te talitonu, o lea ua tulai mai ia le sui usufono o Safata 1 lau afioga Leana.

**Afioga LEANA RONNIE POSINI:** Ia faafetai tele i lau afioga i le Fofoga Fetalai, ia e manatu foi e fia faaali foi se manatu o lenei itumalo i le Tulafono Tau Faaofi. E momoli le faafetai tele i le afioga i le Minisita po o lau afioga i le Sui Palemia i le tulaga o le Tulafono. Ia o se manatu puupuu o le matou itumalo pe a vaavaai atu i le Tulafono, Tulafono 1977, ona sau lea i le 2014, ia ae o lea ua i ai le Tulafono Tau Faaofi e i ai le aso le Tulafono a lau afioga.

Ae e pau lava lea o lau tau faitau atu i ai, a ou vaai atu i le Tulafono Taufaatotonu lea ua aumai, o lea na sau lava i le 1977, 2014 o lea ua oo mai i le aso, o lea foi ua matau e lenei itumalo, o lea e faaauau ia le Tulafono faatonutonu lea. E i ai foi la le manatu i lou talitonuga, o e foi na tusia le Tulafono i tausaga ua mavae, o tagata foi e i ai o latou poto faapitoa. E le saga tusia foi e tatou o tagata e i ai le poto faapitoa e tusia Tulafono. A lea la ua matau, e na o se teuteuga o le Tulafono Autu.

Ae vaavaai atu i le Tulafono Faatonutonu, e le o suia ia le Tulafono, ae o Tulafono Faatonutonu ia e i ai papuipui, e i ai auala ma taiala e faatonutonu ai galuega a Komiti. O lou la lea talitonuga, e tau leai se uiga tele o le Tulafono lea e aumai e teuteu. O le manatu lava lea o lenei itumalo.

Lona lua lau afioga i le Tulafono lenei, lau afioga i le Fofoga Fetalai ona o lea la ua matau atu ua agai ai lea ua aafia mea tau faatoaga. E pei foi ona taua e nisi sui usufono o lenei itu, e pei o lou popolega lea, o nisi o le aufaifaatoaga. Ia o lea foi e taua e nisi o tagata ia e omai mai fafo o tagata e omai aua e leai ia ni o latou fanua ma tulaga faapena.

Ae o kamupani nei, e omai e tele ia latou tupe, lea foi ua taatia ia le Tulafono a le tatou atunuu e omai lava lisi ia fanua e faaoga ai ia faatoaga. O lou popolega o faatoaga ma faigafaiva, aua ou te talanoa lava au ia i lo matou itumalo. O lea foi na maua e le i faailoa mai ia le asiasiga a lau afioga i le Minisita o Faatoaga, ia i lou asiasi atu foi i faatoaga a lo matou nuu, o lou popolega lea. Leaga e ulufale mai loa ia... ia ona aafia lea o tatou

faifaatoaga. O lou la lea manatu, leai sa tatau lava ona valaau pea uma ia le aufaifaatoaga ma le Ofisa o Faigafaiva o tagata uma o lo tatou atunuu. O i lea e tua i ai ia o matou tagata, o matou ia ma le itumalo o i lea e tua i ai i mea tau faatoaga.

O le a le mea na le valaau ai? Talo ai se latou fononua ma tulaga faapea ina ia manino ai, aua o tatou lava ...

**Susuga Hon Laauli Leuatea Polataivao Fosi:** Lau afioga i le Fofoga Fetalai...

**FOFOGA FETALAI:** Malie le sui usufono mamalu, se i tuu atu le avanoa i le afioga i le Minisita o Faatoaga.

**Susuga Hon Laauli Leuatea Polataivao Fosi:** E tatau lava ona faapulapula ia le tulaga lea leaga o la e tapuai mai le aufaifaatoaga ma le aufaifaiva i le atugaluga ma le tuualalo foi mai i lena itu.

O le ulufale o le Faatoaga ma Faigafaiva i le Tulafono a le Minisita, masalo o se taimi muamua lena faatoaga amanaia ai le itu lea. O le taimi ua sola i le 20 po o le 30 tausaga talu ai, e pau lava le mea na agai i ai ia faamanuiaga nei, falegaosimea, turisi. O lea la ua o tatou oo tonu mai lava, o fea le mea lea ua o tatou toe o i ai? Faatoaga, faigafaiva ma mea lea e taumafai atu.

Ou te faafetai i le Minisita i lona magafagafa. O le Kamupani moa lea ua uma ona tau i le atunuu o lea foi matou te faatalitali i ai, o le kamupani moa e aumai i nei e replace ai le 70 containers lea e tatou te taumamafa ai i le masina e tasi. O pusamoa ia e aumai i le atunuu e 70 container lea e aumai i le masina, o atinae na o lea e mafaufau le Malo e aumai e replace ai mea ia e aumai mai i fafo e taumamafa ai le atunuu. Ae o le faatinoga la o lafumuoa e tufa moa e faafailele e tagata ona toe aumai lea i le kamupani lea, e le o se mea laitiiti la faamolemole sui usufono mamalu.

O le ala lea ua apaapa atu pea, o lea ua fai ia le fuafuaga a le Minisita ma le Matagaluega aafia ai ma le Faatoaga ma le Faigafaiva. O le fesoasoani mo le aufaifaatoaga le aumai o se kamupani pe tasi pe lua kamupani tetele ia po o le kamupani faatoaga e fesoasoani mo tatou. Ua outou silasila i kamupani ia na aumai, e le o mafai ona gaii ua laitiiti ia le uafu. E le o mafai foi ona expand ia le latou service aisea? E leai ni fesoasoani tele a le Malo o avea i ai.

E tele mea o le Pua? Na aumai i lou taimi 2016, o la e tutu lava i le phase one ae four phases na omai ma latou. E oo mai i le aso, o la e nofonono i le phase one. A ua leva na manana o e aumai ia ia, filei ma ave loa. E pau lava le mea la e fai i le taimi nei, na ona omai lava toe uta i container ave toe sent. E leai se tatou tupe tele o maua.

E pei o le ala lena leaga o lea ua toe laga mai e le tele o sui usufono mamalu ma le malamalamaaga lautele, o le fesoasoani e omai ai ia kamupani e tele



tupe, ma tele ia le tamaoaiga e fesoasoani i o tatou faifaiva. Ia na i ai foi le isi taimi na aumai ai foi le ofa 20 vaafagota e aumai e partnership ma tatou faifaiva iinei. O le a le mea na fai? Na cancel, na cancel fai mai o auala faaalatua \$30 miliona lena poloketi. Na cancel e le Malo, ae o ai e pologa ai? O n ai o tatou tagata ia e gata ia le taumafai i alia, e le i oo lo latou taumafai i commercial boats.

O lea la e taumafai atu ai, e aumai ia kamupani lapopoa ia, e maua ai e nai o tatou tagata ua leva na alia e o i luga o commercial boats. O lea ua ou manatu e tataua ona faamalamalama. O le isi itu, a omai kamupani nei, o lea e avanoa eleele a le Malo o le STEC, e o e lisi ai ma faipaaga ma le Malo ina ia manuia foi lea Matagaluega a le Malo, lea e tau feula atu nei.

Ia o le faamalamalama lena e faamalulu atu i lou... i le le tapa o lau afioga i le asiasiga. Leai e le o le agaga lena, o le le amanaia o lau afioga. Na ou alu atu sao lava i le aufaifaatoaga na omai sao lava ia te au i le Ofisa e manaomia le fesoasoani. Fai mai ua fiu e o atu i le sui usufono e leai se fesoasoani. Ia omai sao loa ia te au lea na ala ai ona ou alu atu.

Ia o le agaga lena ae aua e te popole, ou te toe alu atu foi i lea vaiaso.

**FOFOGA FETALAI:** Ia ou te iloa le sui usufono mamalu o lea ua manino le saunoaga a le Minisita ia ma faiga faavae ma faataatiaga o fuafuaga a le Malo. Ou te talitonu foi o la e faafogafoga mai ia le aufaifaatoaga i le agaga tonu ma le agaga faamaoni o le Minisita ma le faigamalo mo la lea foi fuafuaga.

Ia o le fesoasoani atu lea i le sui usufono mamalu. Saunoa mai le sui usufono mamalu.

**Afioga LEAANA RONNIE POSINI:** Lau Afioga i le Fofoga Fetalai, faafetai o lea ua saunoa ia le afioga i le Minisita. Ia ae o lea ou te matau atu i le uiga o ana saunoaga, le tulaga lea o le sulu atu o nai tagata o le matou nuu i mea tau fesoasoani i mea tau faatoaga, ae leai sau fesoasoani ae leai sau fesoasoani o faia i ai.

Lau afioga ou te fia tapa ni faamaumauga o faamaoniaga o le saunoaga a le Minisita leaga e le mama tuuaiga. O la e faalogologo mai ia lou itumalo. O le tulaga lena, afai o afio mai...

**Susuga Hon Laauli Leuatea Polataivao Fosi:** Ia o lape o lauga, ua pei lau afioga e te le iloa sua. Ia foi mai la lau upu, faafoi mai lau upu pe a faapea o lea...

**FOFOGA FETALAI:** Ia, tulai mai le sui usufono mamalu.

**Afioga LEAANA RONNIE POSINI:** Ia faafetai i lau afioga i le Minisita. Ia lea ua e faafogafoga mai Samoa i le tali a le Minisita.

Lau afioga e manino le saunoaga a le Minisita e pau lava lea o le mea na ou tapatapa i ai, se finagalo o le aufaifaatoaga. Na pau lava lena, o fuafuaga a lau afioga, ia o le finagalo lea o le tatou Malo. Ae tatou amanaia ia finagalo o matou lea e o i vaaalo i tua, ae o mea faapena, savali i uta e galulue i faatoaga. O tagata na e tua i ai aiga ma nuu ma ekalesia. Ia ae pei o lea ua e saunoa lautele i le tamaoiga, e alu lava lou manatu i tagata taitoatasi o lou itumalo, ia ma le agaga faaaloalo faafetai.

**FOFOGA FETALAI:** Malo faafetai saunoa i le sui usufono mamalu ou te iloa lea ua manino foi lenei mataupu ua saunoa le afioga i le Minisita.

**Afioga Hon Lautafi Fio Selafi Purcell:** Lau afioga i le Fofoga Fetalai....

**FOFOGA FETALAI:** E i ai se mea e ... ua uma ona e saunoa le sui usufono o Satupaitea...

**Afioga Hon Lautafi Fio Selafi Purcell:** E faamalulu atu, ioe ua o ta iloa lava ua o ta agasala i ou luma, luma o lenei Maota tele. Ae e na o sina mea lava e faamalamalama ma fia faasao i le saunoaga.

**FOFOGA FETALAI:** E te silafia foi lau afioga e le mafai ona e faauilavea i le faauilavea?

**Afioga Hon Lautafi Fio Selafi Purcell:** O le mea e fia faamalamalama lau afioga. E puupuu lava.

**FOFOGA FETALAI:** Ia e tuu atu lava le avanoa ona o oe le alii matua. Faamolemole o lea ua e faafogafoga mai, e le o faatagaina. Ae saunoa.

**Afioga Hon Lautafi Fio Selafi Purcell:** E le toe faia, e le toe faia foi lau afioga, leaga o lea sa taua i lau lauga, leaga o lea ua saunoa mai ia le Minisita, o le 30 tausaga aua e leai lava ni mea alu ese mai i mea ia o lea sa taua e lau lauga.

I le Kapeneta talu ai nei e feoloolo lava pe 3, 4 ni poloketi tetele e le fit lelei i lalo o le mea lenei foi lea o criteria. Ae na fai i ai le fuafuaga ona o le auga o le Tulafono atoa a lenei, ia aumai pisinisi e fesoasoani i le tamaoiga o Samoa. E le ave a ifo la le Tulafono sa i ai faapea sa tataua ona aumai i inei i le Palemene e toe sui ai, ia ae na sui lava i le Regulations na i ai e pei ona silasila i ai, ou te manatuaina lava o le poloketi tele lea lea e masani foi ona omai ai le Vaega a le SURVIVOR, ia se i vaai i le tele o tupe na maua mai i lena mea. Ae e le o i lalo i i.

Ia o le Vaega lea o le falemoa a Frankie ma le isi Vaega, ona ua sioti le fuamo. E le mafai e tatou ona supply le fuamo. O lea na taumafai ai e faatu

se fale e latou te mafaia. O lea la na Talosaga mai Frankie ia o le mea lena na faaaoaga i ai le discretion a le Kapeneta i lalo o Regulations lea na fai. Ne i te i ua faapea mai, o mea a le faigamalo na tuana'i atu nei, ia leai na o atu lava faaauau le tele o mea. Ia faafetai.

**FOFOGA FETALAI:** Ia ua e masani foi lava i saunoaga a le Minisita o Faatoaga. Ia e faapena ona o le agaga lava ia faapena ona sologa manuia ia le atunuu. Ia ae i ai lava si mea lea le sui usufono mamalu o Safata, leaga o lea na e saunoa leaga o lea e faamaumau e le Nofoa, e leai se uiga e toe aumai ai lenei Tulafono.

O lea ua e faafofoga atu, o lea e i ai faatoaga ia ua tuu i ai. E te finagalo e tuu pea lau saunoaga lea pe aveese ma faamaumauga.

**Afioga LEAANA RONNIE POSINI:** Lau afioga e faatumau pea ina ia lou finagalo.

**FOFOGA FETALAI:** Ia lelei, o le a faatumau pea lau saunoaga i i, e ui lava e ese lou finagalo lea ua faaalua. Ia o le taimi lenei, ia ua maua foi le avanoa le tatou Maota.

Ia o lea ua matau atu o lea ua fou mai le sa o Aana Alofi Nu 2 lau afioga Aiono. Ia lou avanoa lenei.

**Afioga AIONO TILE GAFA (Aana Alofi 2):** Faafetai i lau afioga i le Fofoga Fetalai, tulai atu foi ma le faaaloalo e fai atu sina manatu puupuu lava i le Tulafono e pei lauliliu i ai le tofa ma finagalo o le tatou Maota le paia i le Palemene. Faamalo foi le onosai ma le lavapapale i le tatou usugafono.

Ua tele lava i le faalogologo atu, matau atu i finagalo faaalua o sui usufono mamalu o le Palemene e pei ona talanoaina le Teuteuga o le Tulafono. Ia ua manino foi ma malamalama foi lenei sui usufono ma lenei usugafono. Momoli atu lava le agaga faafetai, ua maea ia le Tulafono autu, ae e pei o le teuteuga lea ua tuuina mai ina ia faaatoatoa ai nisi Vaega e le o manino lelei e le o taoto lelei i lagatonu tulaga o le Tulafono.

Ae momoli atu le agaga faafetai e faaleo ai le agaga faafetai o lenei itumalo mo lenei usugafono i le tofa tuutuuloloto ma le tofa tuutumamao, tapenaga aua se agai i luma o le atunuu ma ia foi atinae.

E pau lava le tulaga lau afioga i le Fofoga Fetalai, e pei foi ona maua saunoaga a nisi o sui usufono mamalu, si Vaega lava lea mo mea o le tatala o avanoa, tatala o avanoa i atinae ua agavaa. O lea ua manino tulaga e pei ona aumai, tulaga i turisi ma faletalimalo ia aemaise foi o tulaga i faatoaga ma faigafaiva ma isi galuega e agai i ai ia le teuteuga. Ae o lea e aumai ai ma le Vaega lea, ia o atinae ua agavaa.

O lenei vaitau lau afioga i le Fofoga Fetalai, e moni lava e pei ona faafogafoga atu i saunoaga ma faamalamalama a le Malo ma le afioga i le Minisita, ma le Minisita foi o faatoaga i tulaga o atinae ua i ai ia lo tatou atunuu. Ua tele le suiga alualu foi i luma aemaise o faigafaiva ma tulaga faapena.

Ua laa i luma le olaga i lenei vaitau e talitonu ua tele ina faaaoga masini e fai ai ia faatoaga. E oo lava e toe lava o le tutuiga o le oso e tui i ai le tiapula. Ae o le agaga lea i le faaupuga lea e aumai o atinae ua agavaa ae faasino tonu i Faatoaga ma Faigafaiva. Ioe o tatou atunuu o faatoaga lava e tua i ai i lenei vaitau. E le gata i taumafa ae o tupe maua a lo tatou atunuu. Ae o le agaga lena ina ia matua manino ma maioio ia le tulaga lea, tulaga lea ia tatala le avanoa pe afai o le finagalo lea ina ia lautogia ai. O a lava ituaiga atinae leaga o lea e le o mautu ia le tulaga o le vaevaega o le teuteuga o le Tulafono.

Ae e lagolago ia lenei itumalo e lagolago atu i le Tulafono pe afai o le silasila lea i le mea e manuia ai le atunuu ia ma fesoasoani foi ia aua le atinae ma e fai mai i totonu o le atunuu ma pisinisi, ia e le gata i tagata faigaluega ae o tupe maua ma tupe totogi lava lea ua faasalafa tulaga i tiute o oloa e auina mai i totonu o le atunuu i tapenaga o le faaauauina o lea galuega.

Ia e pau lea o se leo o le tulai atu lau afioga i le Fofoga Fetalai e momoli atu le faafetai e lagolago ai i le Tulafono. Ia manuia le Fono, Faafetai.

**FOFOGA FETALAI:** Malo saunoa, faafetai i le saunoaga a lau afioga i le sui usufono mamalu Aana Alofi Nu 2. Malo lava le tofa faafetai saunoa.

Ia o le avanoa lea mo le sui usufono mamalu mai i Falelatai ma Samatau. Tulai mai le sui usufono mamalu.

**Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau):** Faafetai i lau afioga i le Fofoga Fetalai mo le avanoa. E fai atu ai foi se sao o lenei itumalo i le Tulafono toe teuteu e pei ona i ai i le Laulauafono a le Palemene.

Manatu ua Manino le tele o Vaega o lenei Tulafono toe teuteu e pei ona saunoa manino le afioga i le Minisita, ia e lua lava sini autu o lenei Tulafono.

O le sini muamua, o le faamanino lea o tau atinae ua agavaa. Ae sa maua foi sina avanoa e toe tilotilo ai i le Tulafono 2014, ia peiseai sa i ai lava le provision i lalo o le fuaiupu lea 127 (2) ma le (3), ia e agavaa ai ia le faatinoina o le Vaega lea. E ui i lea, ia o lea ua saunoa manino ia le afioga i le Minisita o Faatoaga, ia o le tau faaofiina i totonu o isi galuega taua ia o lana Matagaluega. Ia manatu ana aumai lava na o galuega atinae ia i le Ofisa o Faatoaga i le Tulafono ai se manaia, nai lo le aumaia atoa o le teuteuga lenei.

O le Vaega lona lua, o lo o faapea mai le sini autu lona lua o le Tulafono toe teuteu, ia tuuina atu ai le malosiaga i le Komiti o Tupe a le tatou atunuu, le Investment Committee. Ae i lau faitau atu i le Tulafono toe teuteu lea ne

i te i ua misi ia te au, ua ou fiu e vaai pe o fea se Vaega o le Tulafono toe teuteu lea ua tuuina mai, o aumai ai se faaupuga faapena e tuuina atu ai le malosiaga i le Komiti lea e latou te iloiloia ia tulaga ia tau Talosaga. E na o se... te i ua sese au a ua ou fiu e tau autilo ou te le o maua i le Tulafono toe teuteu le Vaega lea.

O le isi Vaega taua e avatu ai se fautuaga i lau afioga i le Minisita, e faapea foi le Matagaluega o le tulaga i le atinaeina o malosiaga faafouina ona ou te molimau atu le faigata le faatinoina o le tatou tauofoga i le malosiaga faafouina sa fai i tausaga ua mavae. O le faigata o lea Vaega, ona e le o manino i lalo o le Tulafono, po o a ni incentives a le Malo e mafai ona tuuina atu i Kamupani e fai mai ia tauofoga ina ia taumafai e faataugofie tau o le tatou eletise.

E pei e faatoa fai ia le Vaega lea ina ua uma ona fai ia le tauofoga, ia ae o le popolega i le Vaega lea, ona o le a le mafai ona tutusa ia le playground e fai mai ai ia tauofoga a kamupani. O le mea la e tulai mai e matua faigata lava i le Faalapotopotoga ma le Malo ona ases ia tauofoga ia e aumai, ae avatu ai se fautuaga i lau afioga i le Minisita, silasila agai i luma, aua ua tele atunuu o le lalolagi ua fai lava ia latou Tulafono e specific lava i le atinaeina o le malosiaga faafouina, aua e le o po se lilo i le tulaga o lo o taumafai ai atunuu uma o le lalolagi, ia o lea foi e i ai le manulauti a lo tatou atunuu. Ia ausia le 100% o le malosiaga faafouina.

Ao luitau ia o lea e feagai ma le Sector ma le Faalapotopotoga aemaise o le Malo e fai o le taumafai e faa 100% le malosia faafouina, ae e le o mafai ona upfront ia le Malo. Ia avatu ia le latou fua faaaliali i kamupani, o incentives ia ua mafai ona ofo atu e le Malo o Samoa i kamupani e omai e gaosi ia le eletise i malosiaga faafouina. E pei o le tulaga lena e manatua ai ma avatu se fautuaga ao tatou i ai i le Tulafono lea, aua o le taimi nei, ina ua amata ona agai mai ia ma agai le Malo e atiae ia malosia faafouina, ia sa taumafai e ave i lalo o Manufactures Act na e i ai, ina ia mafai ai ona agavaa i faamanuiaga ia.

Ae o le tele o atunuu i fafo, talu ona amata mai ia le malosiaga faafouina, ua matua kilia lava ia latou Tulafono ma latou policies, ia e omai foi la kamupani i atunuu i fafo e aumai ia latou tauofoga ma latou proposals, ia ua matua manino lava i Vaega ia.

Ia e pei o nai fautuaga ia e tuu atu i luma o lau afioga i le Fofoga Fetalai, ia manuia tele ia le Fonousu a le Palemene.

**FOFOGA FETALAI:** Ia malo faafetai, malo foi le saunoa i le sui usufono mamalu. Ia, o lea ua matau atu e pei ua i ai le agaga o le Maota i le tatou Tulafono. Se i tulai mai ia le sui usufono o Vaisigano Nu.1. Ia se i maea le sui usufono o Vaisigano ona tuu atu lea o le avanoa i lau afioga.

**Afioga NIUAVA ETI L. MALOLO (Vaisigano 1):** Lau Afioga i le Fofoga Fetalai, e manatu o lea ua maea foi ona e togi le soi i le tuaoi, ua maea foi ona e lauta le upega aua le Atua ma Lana taitaiga i galuega tauave a le Palemene, ua malo faafetai. E faatalofa foi i lau Afioga i le Tamaitai Palemia ma le Kapeneta aemaise foi o Minisita Lagolago ma le paia ma le mamalu o le Palemene le Fonousu a Samoa.

Ae manatu e fia tu foi e fai se sao aua foi le Tulafono ua i lumamea. E manatu lau Afioga i le Fofoga Fetalai, a o le i oo se lagona i le Tulafono, ua ou manatu o se laolao lelei lenei e faaleo ai se agaga o le faafetai. E ui lava ua maea ona fetalai Malolo ma Malolo ma Malolo sa fai foi ma fofoga taumomoli o le afioga i le Aloalii. Ae a le saunoaga pau a le afioga i le Gafa, susu le Gafa ia Vaepule. E manatu le sui usufono, e le mafai ona nofonofono Niuava, e mafua i se a? E mafua ona ua outou sii le fale o Asomua, ua outou sii le mauga ma gagau le auu ia outou faaaloaloga mauualuluga, i le lagia ai o Falepau ma Faletagaloa, i lena vaiaso ua mou atu.

Lau Afioga i le Palemia ma le Kapeneta ma le Palemene mamalu o Samoa, ua faamalo faafetai, e le gata o le tagavai o le Malo Tutoatasi o Samoa, o le pulu ma leuleu na tatala, ae a le seleni paia, sa outou maau i ai ma outou faaaloalo i ai, aua le afioga i le Aloalii. O le foi sa ia asaasaina le gasu o le taeao i lenei itumalo o Vaisigano Nu 1 i totonu o le Palemene. E faafetai mo le faatofalaiga, faafetai mo le auai.

Lau Afioga i le Fofoga Fetalai o le Maota, Sui Fofoga Fetalai, Minisita Lagolago aemaise le maualuga o le Palemene o Samoa, e ui lava ina le auai atu lena Itu, ae na mafanafana la outou tatalo, na sao ma uli ai le sa o le afioga i le Aloalii.

E faafetai i lau Afioga i Le Ao mamalu o le Malo o Samoa, lau Afioga Tuimalealiifano Vaaletoa Sualauvi II ma lau masiofo. Lau Afioga i le Sui o le Fono o Sui Tofia ma lou faletua. Aemaise lau Afioga i le Faamasinoga sili ma lou faletua, ua faafetai mo lo outou agalelei. Ua faafetai mo upu tuumumusu ma upu faalaeiau, ae a le toga na tatala, o seleni paia na outou maau i ai, ona o le mafutaga na mamae ma pele ma le afioga i le Aloalii.

O le matou tatalo o aiga na lua, e auala atu i le suli taumanava o le afioga i le Aloalii, ma le Gafa ma Malolo ma Malolo, ia alofagia e le Atua ma toe faatutumu mea ua faagaogoina.

Ae matou se asuasua atu foi vai malu i Puega, ua pupuu lima ua tua i le papa ae lumafale i le moana le paia i aiga na lua. Ua auau foi maa o le mativa aua se faaaloalo i le maualuga o le afio atu. Faafetai faafetai tele.

Lau Afioga i le Fofoga Fetalai, ona ou oo mai lea i le isi vaega. Se e ese lava ou lagona i le aso ananafi, ina ua pau le tanoa i le Afioga i le Palemia ananafi, ma ia momoli le faaaloalo mo le tapuaiga i le Afioga i le Sui Taitai ma le mamalu o sui usufono na faia mai i le fuifui o le Itu Agai. Lau Afioga i le Palemia, se ua faamalo le tofa faatupu, malo le faatamalii, e le tauilo lava ou faiva. E te saunoa mai foi lava, o oe lava o le tupu. O upu a le tusi e te

faia lava measili ma e manumalo ai lava. O le agaga faafetai lea ia te au, ua e faia se lesona taua mo le Palemene, tatou te agai ai i luma, aua le nofo fealofani a le Palemene o Samoa.

Lau Afioga i le Fofoga Fetalai, ae o le itu e meemee ai le lagona, na maua lava i le iuleo i ou tua i le aso ananafi, e faapea, o se mea fou lenei mea ua faia e le Palemia.

Lau Afioga i le Fofoga Fetalai, ona oo mai lea o se lagona i le Tulafono e pei ona faataatia nei i luga o le Laulau-a-Fono. Le tapuaiga a si ou itumalo, o lea lava e uunai lava le tuumumusu i le tatou Faigamalo, ina ia fau le uafu i Asau, vaai se faleia i luga o le uafu i Asau. O nisi nei o poloketi po o vaega, o lea e lagolagoina ai e la outou sui usufono ia le Tulafono ma le Teuteuga e pei ona i lumamea. O le matamata atu i lenei Tulafono ma le tulaga o le faaopoopoina e matuai lagolagoina e lenei itumalo, e pei ona i ai poloketi nei e fuafua, aua foi le manuia o si ou itumalo. Ae ou te faafetai o lea ua i ai se faataotoga lelei, ma ou te manatu foi, o le a sologa lelei ai le auala o le a agai i ai le afioga i le Ofisa sili o Pulega, ma le Ofisa sili lagolago ma le Pulega ma le Matagaluega, e faatino ai a na galuega. Ae tatou tulimatai pea, aua e moni lava fetalaiga foi ma tanoa pau, e leai lava se Malo, e faia se Tulafono e tuu ai se sala i luga o ona tagata. E faafetai mo le Tulafono ua taoto.

Ae ua ou manatua i le tusi lea a le Tupu 1:19. O lo o i ai le autu e faapea, fai mai ua le mautonu Elia, e taunuu atu Elia, i le vaavaai a Elia i le tulafono, e ese le matagofie o le Tulafono. Aepeitai o le vaavaai a Elia, ua tea le tausaga, ua mamao i tua le tausaga, ua fou le tausaga, e tatau ai ona toe tuu se teuteuga lelei aua tagata o le nuu o Isaraelu. E pei o i ina lea e tau aumai ai se lagona, o i ina tonu lava le lagona o lea e faataoto mai e le Minisita aemaise foi o le Matagaluega. Ua matagofie le Tulafono o i ai, ae na ona toe sui le ula ina ia manogi, ina ia manogi atili, aua le manuia alualu i luma o si o tatou atunuu. O lona uiga lau afioga o se Tulafono ua teuteu ua matagofie, ua faapea ona faataoto i luga o le Laulau-a-Fono.

O se faaopoopoga lea lau Afioga i le Fofoga Fetalai, o lenei matou te lagolagoina ai le Tulafono Teuteu e pei ona i lumamea. Faafetai.

**FOFOGA FETALAI:** Ua malo saunoa i le sui usufono mamalu mo Vaisigano Nu 1. Atonu o lea ua faafofoga ma le manino le paia o le Palemene, aemaise foi o tulaga na faafeagai ai ma lona vaiaso, i le faamavae atu ma le afioga i le Aloalii, atonu o lea ua maua lelei lau saunoaga faafetai i le paia o le Palemene nei, aemaise o faaaloalo e pei o tulaga e masani ai. Ua malo faafetai saunoa. O lea foi ua aumai lou finagalo e tusa o le Tulafono, ua faamalo faafetai mo lou sao.

O lea e matau atu o lea ua fou mai le sa o Vaimauga Nu 1, saunoa ia.

**Afioga SULAMANAIA FETAIAI TAUILIILI TUIVASA (Vaimauga 1):** Faafetai mo le avanoa i lau Afioga. A o le i faia se sao o lenei itumalo, e muamua lava ona faafetai i le Atua, ua tatou aulia lenei masina lona lua o lenei Paeaiga o lenei tausaga, o lo o aoina lava le alofa o le Atua i lenei Palemene. E ui foi ua avatu nisi o tatou tama i atunuu mamao e saili gasegase, a o lea lava e faamanuia le Atua i le la Itu i le Palemia ma le Kapeneta. E a lau Afioga i le Fofoga Fetalai ma le mamalu o lenei Palemene. E manatua lava e lou loto le upu o le Afioga Paia a le Atua, “E galo ea i le fafine ona faasusu lana tama,” ae le mafai ona galo oe Samoa, e le mafai ona galo oe, galo i tatou i le silafaga a Samoa. E ui ina poia i tatou i le faamai oti, a lea e oo mai lava i le taeao lenei, e leai lava se isi o oti. Ona o le a? E faafetai ai i na i tuua ua lagomau mai i tiasa, i le sao o le filifiliga na tuu ai Samoa, e faavae i le Atua le Tama le Alo ma le Agaga Paia e oo mai i le taeao lenei. O le faafetai lena a lenei sui usufono.

E faafetai foi i lau Afioga i le Fofoga Fetalai, mo le faafoefoeina o lenei Maota. O le Tulafono ua opea i le Maota e lagolagoina e le sui usufono lenei. E faalogologo lava ma le totoa i le saunoaga a le Minisita, ma aumai foi lona finagalo, pei ona avatu foi le manatu o lenei itumalo. O a mea ua outou silasila atu ua lelei, o tatou lena, o a foi ni mea tou te manatu e toe teuteu sa i ai le Faigamalo, o lena ua ia outou le malosiaga.

Ae 2 lava ni vaega ou te fia talanoa ai i lenei Tulafono, o le tamaliiaga ma le Paiaaga o le Maota lenei, e magumagu tele i ai le sui usufono. A silasila i ai i le tatou faatalatalanoaga ananafi, na saunoa ai le sa fai ma sui o le Matagaluega, e fai mai, e tauafei ana tala. Ua saunoa le Minisita i lenei taeao, e leai se Tulafono na faatino ai lenei vaega o le Tulafono. O le tamaliiaga lena o le Palemene lenei o lea e popoe ai le sui usufono. I le vaai a lou sui usufono, o lea sa i ai lava Tulafono Faatonutonu i le 2010 na faatino ai le vaega lea.

A o lenei Tulafono ua toe aumai i totonu, talofa e, talofa e i le Minisita ma le Faigamalo. E pau lava le tulaga lea ua omai, ua omai loa ia...o lea tatou te talanoa i le tamaoiga o si o tatou atunuu. Ia maua ni tupe ma ni mea aua le atinaeina o Samoa ma lona atunuu. A o le Tulafono lenei, ua toe tuuina mai, o lea e pei ua faamautu i totonu o le Principal Act ia le tuu i ai i totonu. A o la lava sa i ai i le Tulafono Faatonutonu, o le uiga la o le aotelega lau Afioga i le Fofoga Fetalai, tatou te le o talanoa lava i ni tupe maua mai. O lea tatou te talanoa i le leai o se tupe, incentive e exempt mai i le Tulafono a le Tiute. E i ai le popolega o lou sui usufono, e talanoa loa i le tuusaunoaina, e tele lava le aafiaga. E leai se mea e tua i ai Samoa, e leai se mea e tua i ai o tatou tagata. Ona o le Matagaluega lea, o le 90% o le tupe o lo o faatino ai a tatou fuafuaga e aumai i le Matagaluega a le Minisita. O lea ua tatou toe talanoa foi i Kamupani tetele ma mea faapena, ae i ai lava le popolega a lou sui usufono, a faapefea nai tagata taitoatasi.



E faafetai lava i le Minisita o Faatoaga, o lea ua tuu i ai i totonu ma le incentive lea toe exempt mai o Kamupani faifaatoaga. Ae maumau e pe a tuu i ai i totonu ma faifaatoaga taitoatasi. Ua fia aumai lana loli, la e i Ausetalia i ona aiga, aumai i Samoa e fai ai lana atinae, a o lea tatou te lilifa lava i faletalimalo ma mea faapena, i le leai o ni lafoga. E pei ona saunoa se sui usufono i lenei taeao, o le popolega foi lena. E talanoa loa i incentives, leai o se lafoga, leai foi se income tax e faila ina. O fea la e tua i ai tatou? A o lenei Tulafono ma lau vaai, e pei o le faanoanoaga lena, o lea na saunoa nei i le taeao le Minisita, e leai se Tulafono na faatino ai lenei, e pei e tuuaina le Paeaiga ua tuanai. A o a outou foi saunoaga, alo i luma le foe, a o lea lava e fai ma tepa i tua. A o lea lava e fai ma tepa i tua, e lelei pe a na talanoa i se Tulafono, a o se Tulafono e maua mai ai se tatou tupe maua. O le mea foi lea na pasia e le Paeaiga ua tuanai ma isi...le mea lea o le PACER PLUS, lea e fai ai fefaatauaiga e leai ni tiute. O lea la ua aumai nei, toe tuu foi avanoa i Kamupani tetele nei. O le vaega lea e 127 lea e i ai o le Tulafono, e faafetai lava o la lava sa i ai le malosiaga i le Ofisa Sili. A iloa ni Kamupani faapea, e i ai lava le malosiaga e toe logo e totogi mai ni lafoga, e po o le vaega 1 ea lena. A o le vaega 3 o lena foi e i ai le vaega i le malosiaga i le tagata ua le faamalieina i le talosaga e mafai ona tuusaunoa mai lana tiute, e toe tusi ai foi i luga. E tele avanoa na tuuina mai. Ae o le naunautaiga o lou sui usufono, ua gasea lava, ai faapea o lau afioga o le alii loia lea ua tofia mai. O la lava na i ai le malosiaga i le Tulafono Faatonutonu, e faatino ai le auunaga ma le faatinoina o lau Tulafono.

**FOFOGA FETALAI:** E faamalie atu i le sui usufono, se i tuu atu le avanoa i le Minisita ona o lea ua e taua ona tofiga. Saunoa lau Afioga i le Minisita.

**Afioga Hon Tuala Tevaga Iosefo Ponifasio:** Faafetai i lau Afioga i le Fofoga Fetalai, sa faalogologo atu lava, i le saunoaga a le sui usufono. E lagona lava le faanoanoa, ona e le o le agaga lena o lea na aumai ai le Tulafono i totonu o le Maota lenei. O lea lava e faafoliga mai o lo o outou tete, ma outou faapea mai, o la lava e i ai le Tulafono. E masalo o lea ua uma, e le i afeifei atua, o lea na avatu sao lava le tulaga o lo o nofo ai ma taoto ai le Tulafono, e moni o la e i ai Tulafono Faatonutonu, ae leai se faasinomaga o le Tulafono Faatonutonu. E tatau ona i ai se faasinomaga o le Tulafono Faatonutonu i totonu o le Tulafono Autu. O le mea lena e fia faasao, sa i ai le tulaga lea i totonu o le Tulafono 1977, ae peitai ina ua repeal, ua faaleaogaina lea Tulafono, ae tulai mai le Tulafono 2014, e le i tuua i totonu o le Tulafono 2014 se Tulafono faaauau e faasaoina ai le manaoga lea. E le i i ai se mea i totonu i ina e faapea mai ai, e mafai ona fai ni a outou Tulafono Faatonutonu, e mafai foi ona faaauau ia tiute ia e tuusaunoaina. O se taimi sa ou faapea, sa ou taofiofi lava, ae ona o lea ua e taua le tulaga faa-

loia, e le o le tulaga lea o lea ou te tulai atu ai o au o le Minisita, ou te lagolagoina ma taufaaofi le Tulafono i ala e tataua ona fai. O le ala tonu foi lene ua ala ai ona tatou toe foi i tua i le 2014, ona o le ulu lene, po o le ao lene, e fanau mai ai sei tulou ia nisi o Tulafono Faatonutonu i tua mai. O lea ua foliga mai i lau saunoaga, o lea ua lu'i e le iu le ao. A o le mea moni lene, e le mafai e le atalii ona alu lu'i le tama, leaga o le tama na tupu mai ai le atalii. O le Tulafono Faatonutonu lene e fanau mai le Tulafono Autu.

**Afioga SULAMANAIA FETAIAI TAUILILI TUIVASA:** Lau Afioga i le Fofoga Fetalai, o le a le saoga o lau tala, e lu'i atu e le iu le ao. [.....]. E leaga e matuia le saunoaga lea lau Afioga i le Fofoga Fetalai.

**FOFOGA FETALAI:** Ia alaala mai lalo se i faauma le saunoaga a le Minisita. O lea ua tali le Malo, ona faatoa tuu atu ai lea o le avanoa e faaauau lau saunoaga.

Saunoa lau Afioga i le Minisita.

**Afioga Hon Tuala Tevaga Iosefo Ponifasio:** E leaga o lea ua aumai le fesili po o ai au. E masalo o la e silafia e Samoa le tagata lea e tautala atu. Ou te le o talanoa i tagata, o lea ou te talanoa i Tulafono. O le ulu o le Tulafono o le Tulafono Autu, atonu o le iu, e le i logo malie i lau faafofoga, a o lea o le a ou fai atu o le siusiu. O le siusiu o le Tulafono, o le Tulafono lea e mulimuli mai, o le Tulafono Faatonutonu, e tidy up ai pe faatonutonu ai le tele o mea o lo o agaga i lalo o le Tulafono Autu. E faamalulu atu i le sui usufono pe a ua tetena lou finagalo i le tulaga lea. Ae ua ou tulai atu, aua tatou te agai i tofiga o tagata. O au o le Minisita o Tiute ma Tupe Maua e faasao atu le tulaga lene. O la foi e afio mai nisi o loia, ae ou te le o taua le tulaga lene, ona e i ai lo matou faaaloalo i le isi i le isi, e i ai foi le matou faaaloalo atu i lene itu. E faamalulu atu i sui usufono mamalu faataatiaese lene mea.

**FOFOGA FETALAI:** O lea ua maua lelei le agaga o lenei aso, talitonu foi o le sui foi... e i ai le manatu tatou onosai ma lava papale. E leaga foi le faafofoga mai o le atunuu ua tatou fetauai ma tatou oo i nisi tulaga. O le mea lea, o lea lava ua saunoa ma faamalamalama le agaga o le Tulafono e le Minisita e ana le Tulafono e pei ona tuuina mai.

**Tofa Lealailepule Rimoni Aiafi:** Lau Afioga i le Fofoga Fetalai, si vaega laititi lava lea lau Afioga, e leaga o lea sa ou taua i lau lauga. O lea ua saunoa... o lea ou te uuina le Tulafono, le Principal Act lea. Le Afioga i le Minisita, se i tagai ane i le 344 o le Tulafono.

**FOFOGA FETALAI:** E lelei le onosai mai, se i i ai se taimi e tali ai le Minisita ona toe maua lea o sou avanoa. Tulai mai lau Afioga i le sui usufono e faaauau le saunoaga.

**Afioga SULAMANAIA FETAIAI TAUILIILI TUIVASA:** E faamalulu atu, e le tatau i se Minisita ona saunoa faapea i ni tala faapea. O le mea lea e faamalulu atu ai lau Afioga i le Fofoga Fetalai ma lenei Maota. E tatau lava ona faaoga mai le Tulafono Autu ma le Tulafono Faatonotonu. Ae le o le faaoga mai o au saunoaga na na faaoga mai nei. Ae o le a see ese le sui usufono. E pei ona ou fai atu, e lagona lava le faatauvaa, leaga sa ou galue ai i le Matagaluega lea. O lea e foliga mai sa faasolitulafono lava le tulaga sa faatino ai le auaunaga. A lena e afio mai le sa Sui Palemia, o lena foi e i autafa o oe Laauli, o e sa Minisita i totonu o le Palemene. A o lea faatoa e tulai mai, faafetai la pe a faapea ua sao lau mea lena ua fai. É lagona foi lou faanoanoa, leaga o lau Matagaluega.

**FOFOGA FETALAI:** E faamalulu atu i le sui usufono, ia alofagia mai le faatalaauula atu o le Nofoa. Ia tatou faaeteete foi i saunoaga ma upu i totonu o le Maota lenei, ma ua tauau ina tuutiitia mamalu o Afioga i Minisita ma le tulai mai. E i ai le agaga o le tatou galuega e fetausoai i le avafatafata ma le tatou vafealoaloai. Lau Afioga i le sui usufono, agai tonu pea i le Tulafono, a o le tali a le Minisita, o le tali lava lena i le mafuaaga o le Tulafono ua tuuina mai i le Maota.

Saunoa mai lau Afioga i le sui usufono, faauma mai lau saunoaga.

**Afioga SULAMANAIA FETAIAI TAUILIILI TUIVASA:** O le tulaga lea sa taumafai atu ai le sui usufono, ona e foliga mai sa le mafai ona faatino lenei Tulafono, i le faaupuga lena b, ia faamautinoa ai. O lona uiga sa faatino i le le maautinoa. Lau afioga i le Fofoga Fetalai, ma le Tulafono ua tulai mai, e pei o na i vaivaiga na o le sui usufono. E leai lava se mea o tupu i le Matagaluega ma le faatinoga o galuega ia, e pei ona ou fai atu foi, o lea foi a na aumai lava e pei o nisi foi o sui, a na aumai lava e toe faaopoopo ai i totonu le Matagaluega o Faatoaga ma nisi, e aumai mea e faatino ai lo tatou atunuu, e lelei. Ae pei o lea o le a sui atoa ai le agaga o le Tulafono ma tau faaleagaina ai le tulaga i tausaga ua tuanai ma ni Paeaiga.

A o lenei itula lau Afioga i le Fofoga Fetalai, e faamalulu atu, o le a foi se faafofoga foi ma se matau mai i lenei sui usufono, e lelei lava le avatu i autafa o outou. Pe lelei pe leaga, ia faaoga, a leaga toe foi mai i lenei sui usufono. Ia manuia le Fonousu i lau Afioga i le Fofoga Fetalai.

**FOFOGA FETALAI:** Ua malo saunoa i lau Afioga i le sui usufono mo Vaimauga Nu 1. E talitonu o lea ua agia i le Maota lou finagalo, atonu o se

taimi ona toe saunoa lea o le Minisita e faamalamalama atili le faamoemoe o le Tulafono.

O lea ua matau atu e pei ua maea a tatou sui. O le avanoa leni i lau Afioga i le Minisita.

O lea e matau atu sa faapea o le a tuu atu le avanoa i le sui mamalu o Aleipata Itupa i Luga.

**Afioga FUAAVA SULUIMALO AMATAGA (Aleipata Itupa i Luga):** E faafetai i lau Afioga i le Fofoga Fetalai mo le laolao ua tuuina mai e fai ai foi se sao, e le gata i lea o se tuualalo foi a leni sui usufono, e tusa ai foi ma le Tulafono Tau Faaofi, o lea ua i lumamea. I le tulaga lea o le Tulafono Tau Faaofi o le Ofisa o Tiute 2022.

O lea ua faafofoga le Maota i le tele o finagalo ua folasia e le toatele o sui usufono mamalu aemaise lava leni Itu. E i ai foi le talitonuga, o lea ua tele ia faaleo atu ai foi nisi o vaega sa mafaufauina foi e le sui usufono o leni itumalo e tuuina atu. O lo tatou vaa e fautele, ae o na i vaega laiti ia e tau agai atu ai se faamatalaga, i le agaga, aua e pei e lua vaega ia e pei e aumai, o sini ma mafuaaga o le Tulafono. O lea ua saunoa nisi o sui usufono i le tulaga o le vaega muamua, ina ia aiaia, ia faapea ona mafai ona faamatuu atu ia tuusaunoaga o tiute ma oloa. Ma le vaega lona lua, ia faamautinoa ai le aloaia faale-tulafono o le Komiti o tupe teufaafaigaluega, po o le Investment Committee lea. I le faa-Peretania lena e aumai ai, to ensure the locality of the Investment Committee. E faatino le tulaga lea o le exemption o tiute ia tuusaunoaina. Ona o le tulaga i le matau a lou sui usufono, o lea e faafogafoga Samoa aemaise o si ou itumalo, i tulaga o faataatiaga o Tulafono ma Tulaga uma o Tulafono Faatonutonu aemaise o le faatinoina ma le faamalosi lea e Matagaluega ma Faalapotopotoga a le Malo, o lea o lo o vae ma lima i ai lo tatou Malo.

Ae i le matau mai a si ou itumalo, o le tulaga foi lea ne i ave seseina se faamatalaga faapea, e pei e faasolitulafono nisi o faaiuga fai, i le taimi ua sola, le Faigamalo e pei sa i ai.

**FOFOGA FETALAI:** E masalo le sui usufono, pe ua faafitu ona fai atu le Nofoa i le tulaga lea. Ia aveese upu ia, leaga e le i saunoa faapena le Minisita ma le Malo. E taitaisese ai le faafofogaaga a le atunuu.

**Afioga FUAAVA SULUIMALO AMATAGA:** O le a agai loa la e tau faapulapula lava, leaga o lo o tapuai mai si ou itumalo, i le tulaga lea o le process, le tualumaga o le Tulafono lea o lo o taufaaofi nei. O le Tulafono Autu lea i le 1977, o lea e fanau mai ai ia Regulation po o le Tulafono Faatonutonu lea, i le 2010. E pei o le Tulafono Faatonutonu lea, o lea e i ai le malosiaga lea na faatino ai le Komiti lea, le Investment Committee, e fai ona tiute ia ona agai mai lea i le Tulafono Autu e 2014. E pei o le Tulafono

la lea o lea e agai i ai le teuteuga lea, ona o lea e faapea, ona e le o i ai se vaega o le Tulafono e aloaia ai le Investment Committee, po o le Komiti lea o lo o nafa ma le tuusaunoaina o tiute.

Ae pei o le tulaga foi lele e tau agai i ai se faamatalaga, o lea sa i ai le Tulafono i le 2014, ae o lo o i ai se tulaga e gugu, silent i le tulaga lea foi lea o le aloaia o tiute ia o le Investment Committee. E pei o se faaupuga foi lea ona e mamafa i lou sui usufono le integrity o le Palemene. Aua afai o a ni lape i Tulafono o lea sa gugu i le vaega lea, o le gugu atoa lava lea o le Palemene, aua leaga o le Tulafono sa pasia ma lauilu i totonu o le Maota lenei. Ia afai la ua le i i ai se mea ua atoatoa, faafetai o lea ua aumai i le vaega lea sa gugu ai se i tulou, ou te faaaogaina le upu lea, sa silent ai le Tulafono i le 2014, ae sa i ai i le 2010 i le Tulafono Faatonutonu le malosiaga e fai ai le tiute lea o le Investment Committee, le Komiti lea o lo o nafa ma le lauliliuina o talosaga, aemaise le tuusaunoaina o tiute.

Ona faasolo mai lea i le vaega lea pei ona laga e nisi o sui usufono, a faapea e tuu atu faamanuiaga ia e tele o kamupani, e tatau ona tatou taumafai lava e putiputi lelei le tulaga o ni tuualalo ia e tuuina atu, le tulaga foi lea ne i te i aua e i ai foi isi kamupani e omai foi lele faatafilisaunoa faataalo mai na o ni nai tausaga lava toe taai fala ae o, a o le mea sili o lea ua toe faamatuu atu faamanuiaga ia. Ia pe i ai se vaega foi lele e aiaia ai, a uma loa a faapea o totonu o le term lea ua toe foi le kamupani po ua tapuni po ua faatau ese, e tatau ona toe recover le tupe tele lenei a le tatou Malo, ona a tuusaunoaina loa tiute, lona uiga e leai se tupe a le tatou Malo e maua mai ai, a ia i ai se vaega faapena.

O le isi tulaga, o lea e vaai atu i qualification o kamupani ia po o atinae lea e i lalo i i, o lea sa taua e minimum at least e \$1 miliona le annual turnover po o le tupe maua lea a le kamupani. Ia, pe manaia foi se tatou Regulation fou, ia taumafai loa e categorize foi lea o le vaai lava i nai tagata lautele o si o tatou atunuu, categorize le au vaega matutua ia e omai fafo aua e omai ma tai fia miliona, ae faafefea nai o tatou tagata e tatau foi ona entitle latou ma qualify ai i le tulaga lea. Pe le amata loa ona faataatia loa se schedule e limataitaiina ai le Komiti i ni tulaga faapea ia faigofie ona qualify ai le mamalu o si o tatou atunuu pe categorize mo tagatanuu o Samoa lava ia ia pe amata i se mea o le \$500,000 ae tuu atu le vaega tetele lea i luga po o le \$2 miliona ma tulaga foi... ona o lava lea o latou e taaalo i luga i le malae taalo lea o le A, ae taaloalo atu foi nisi o le mamalu o le tatou atunuu i le isi malae taalo lea. E pei o se tulaga foi lea faapena lea e tau agai atu i ai nai motugaafa e fesoasoani i le tatou Malo. Ae faafetai o lea ua i ai le vaega lea ua tapena e le Afioga i le Minisita ma le Matagaluega. Faafetai o lea ua i ai, e talia foi e lenei itumalo, ae pei o tulaga na e tuu atu pea i ina e fau ai le tatou vaa, o a lava ni mea e talia foi e le faigamalo, ia faapena ona faaoga, ae afai foi e le aoga, ia toe faafoi mai pea i le sui usufono mo Aleipata Itupa i Luga.

O le isi tulaga lea, o le faasafuaina o le mea foi lea faapea o se kamupani lava e tasi, ae ua tele ituaiga sectors e involve ai, lea foi sa taua e le matou Sui Taitai, ina ia taumafai lava e faaeteete i le tulaga lea, o se kamupani e sau i lalo o le Tourism po o le tatou hospitality sector, ae uma ane foi ua agai i le Communication pe agai atu foi i le renewable energies i le tulaga foi lele pei e faaluafesasi ai, ia pe faalafi ai mea e agai mai le isi sector e fau ai ma tau atiae ai le isi vaega.

Ia pei na o ni motugaafa e taatia atu i ina e limataitaiina ai lo outou finagalo, le faufauina o ni Tulafono Faatonutonu aemaise o ni schedules e limataitaiina ai le tatou Komiti o lo o nafa ma lea matafaioi.

Ia pei na pau ia o nai motugaafa, o se manatu foi mai lenei itumalo, aua lava le tulaga foi o le Tulafono Toe Teuteu o lea ua opea i luma o le Maota. Ia ma le agaga faaaloalo lava. Faafetai tele i lau Afioga i le Fofoga Fetalai mo le avanoa.

**FOFOGA FETALAI:** Ia, malo saunoa i lau Afioga i le sui usufono mamalu mo Aleipata Itupa i Luga. Faafetai foi mo le faasoa, atonu o lea foi ua faafogafoga mai le Minisita mo le faamalamalama atili o le mea ua finagalo i ai le sui usufono mamalu. Ia, o lea ua matau atu o lea ua maea tatou sui usufono e saunoa. Lau Afioga i le Minisita, pe o le a faaauau lau saunoaga pe tatou... Ia, e i ai le agaga faapena, ia tapena lelei maia lau saunoaga pe a tatou toe foi mai i le malologa ona o lo o i ai le faamoemoe e fai a tatou tuiga ma tapena lelei mai ai lau saunoaga pe a tatou toe agai mai i le tatou Fono i le itula e 2:00.

O le mea lea ou te faasilasila atu o le a faataatiaese Taulumaga o le Fono Aoao Faitulafono mo le tatou malologa, tatou toe feiloai mai i le itula e 2:00. O lo o ua tapena le tatou taumafataga le mamalu o le Palemene faagasolo ai le tatou tuiga.

*Na faataatiaese Taulumaga a le Fono Aoao Faitulafono i le itula e 12:54 i le aoauli seia aulia le itula e 2:00 i le afiafi.*